

M354: Die Lilie (Versteil)

- 10,7 Si blendent die ougen der amer sundere .
10,8 dat si uan ire sunden niet in mugen gekeren .
10,9 alse si louent die bosheit .
10,10 die ane zuiuel zuo der hellen geit .
10,11 Dar umbe muzen si zueuieldige pine hauen .
10,12 uur sich seluen . inde wr andere lude missedat .
10,13 alhie Sprich van den spotteren
10,14 Nv cuomen wir an die spottere .
10,15 die sich an nimannes wort in willent kere-t .
10,16 noch si ne willent ingeine sunde hauen gedain .
10,17 sowat si bit spotte hauent missedain .
10,18 Den spottere muz ich widerdriuen .
10,19 dat he behalden muge bliuen .
10,20 Jnde den ungezogenen willen wir die selue lerunge geuen .
10,21 dat si beide mugen hauen dat ewige leuen .
10,22 Die uncusche . inde die spotliche wort cuoment van dumben sinnen .
10,23 Wa-t sich die armen niet in bekenne-t noch in uersinnent .
10,24 Sage mir dumbe mensche . weist u wat du sis . wa du sis . wat din gewerdin
sule .
10,25 Jch willen t dich eines deiles leren .
10,26 Du bis ein cranc vaz uol unreinicheide .
10,27 des macht u dich seluen wale bescheiden .
10,28 Du in bis ingeines dinges gewis wan des dodes .
10,29 so du doch der stunden uuerein niet in wizes .
10,30 Du in weist oue du izu leues .
10,31 inde oue du bit rehteme urdeile in de ewige helle geworpen werdes .
10,32 Da muozes du wis werde- an den pinen .
10,33 ane bis du hie du-p an den sunden .
10,34 Din leuen it is leider engestlich .
10,35 want dine sund'e . inde dine pinen merrent sich .
10,36 Dit in were niet so guot alse de geliche doit .
10,37 want so wrde doch minre dine noit .
- 11,1 Nu mirke rehte wa du sis .
11,2 deis tu dat . so wirdes Du wis .
11,3 Du bis in deme entgestlicheme grauen der trene .
11,4 da du dich in salt ingeiner sicherheit uerwenen .
11,5 Der stricke der becorungen is also uile . inde noch me .

11,6 wan des stubbes in der sunnen vare .
 11,7 Du up dat herce inde sich upwert
 11,8 ich wenen din spot he geit honderwert .
 11,9 Da vindes du den engestlichen rithtere alzhā .
 11,10 he hat dat scharpe suert in siner hant .
 11,11 he in lezet ingeine sunde- ungewrochen .
 11,12 si sin gedahc . gedan . oue ge.sprochen .
 11,13 Du must her uure . ganc here uort
 11,14 zelle dine schentliche inde die spotliche wort .
 11,15 Da must du diner boser worde ein ende uinden .
 11,16 da du in macht noch wichen noch wonden .
 11,17 Dar na sich . under dich . inde begrif . dat hellissche afgrunde .
 11,18 da du die nunslahte pinen salt uonden .
 11,19 Die erste is dat uur . dat nimer in reculet .
 11,20 dat ander is die keldene die nimer in rewarmet .
 11,21 Dar na is de wrm undotlich .
 11,22 inde de stanc so unuerdregelich .
 11,23 Dar na die vinsternisse die man sal tasten .
 11,24 inde die hemere die slent ane raste .
 11,25 Dar na die bende suar inde uurich .
 11,26 inde der duuel suarz inde alze ureislich .
 11,27 Dar na cumet die schemede .
 11,28 vant da in is noch der roc . noch dat hemedē .
 11,29 Dar na mirke dusentwerf dusent ungemach .
 11,30 die ingeine zunge gecelle- len mach
 11,31 Kere dich dan umbe inde sich honder dich .
 11,32 inde mirke wi du geleuet has vnnuzlich .
 11,33 Sich alle die zit die du van conde has uerdan .
 11,34 weiz got die rechenunge in mach dich niet vergan .
 11,35 Eine stunde in wirt dir niet uergeuen .
 11,36 also curc alse du din oge mohtes up geheuen .
 11,37 Sich dar na uur dich . inde mirke bit sinnen
 11,38 manich hindernisse dat du noch must verwinnen .

12,1 salt du hi leuen bit dineme vrome- .
 12,2 also dat du zuo deme himele muges cuomen .
 12,3 Allet din leuen is uol becorungen .
 12,4 dar umbe beduanc dat uergiffenisse der zungen .
 12,5 Uvende dich nu zu der rechter hant
 12,6 da uindes du dinen engel alzehant .
 12,7 unvro stande bit einme idelen buoch .
 12,8 want du ne haddes der guder werke ingeine ruche .
 12,9 die an deme buoche solden geschriuē stain .
 12,10 oue du si heddes,,(alse du soldes gedan .
 12,11 Sich zu der lurcer hant wa din uient steit .
 12,12 bit eineme uollen buoche vro i-de gemeit .
 12,13 in deme buoche steint alle dine sunden .
 12,14 van der zit dat du begundes sunden .

12,15 uile eincliche geschriuen .
 12,16 der in is ueral ingeine ungebriuet bliuen .
 12,17 Jn bis du noch nit zuo der uorten erwecket .
 12,18 so bis tu an deme dode gestrecket .
 12,19 Jntwache noch inde laz die bose wort uaren .
 12,20 dat du deme engestlicheme worde muoges intfaren .
 12,21 dat got zu den ungerechten sprechen sal .
 12,22 “geit uermaledieden in der ewiger hellen dal .
 12,23 in dat uuor dat deme duuele is bereit .
 12,24 inde eineme iwelicheme de sine wege geit .”
 12,25 Vlu honne inde ile zuo der cameren .
 12,26 da bluent die lilien bit den grunen bladeren .
 12,27 alhie Sprich van den worden
 12,28 Vvat beceichenet nu dat der lilie- bladere .
 12,29 der is nidene me . inde si sint mere dan da ouene .
 12,30 Wir hauen gesprochen dat de stil is der guode wille .
 12,31 so is des stiles niderste deil . des willen aneginne .
 12,32 so is dat ouerste deil . des guod’e willen ende .
 12,33 Her na sulen wir mirken . inde bekennen .
 12,34 dat in deme aneginne des guoden wille- .
 12,35 nochdan in mach man die wort nieth beduingen .
 12,36 noch bit so grozer mazen gesprechen .
 12,37 on in gebreche beide an der zut . inde an der rehter zalen .

13,1 Uile bladere beceichenent uile worde .
 13,2 inde unbesnidene oue unzutige wort .
 13,3 werden bit den grozen bladeren beceiche-t .
 13,4 Vvir werden dis allen dach geware .
 13,5 dat sich guode lude niet in cunnen bewaren .
 13,6 si in muzen under stunden etzwat sprechen .
 13,7 da on der mazen oue der zute muoze gebrechen .
 13,8 Uuan sowe sich an sinen worden wale behuden can .
 13,9 de is alse iacobus sprichet ein uollecuomen man .
 13,10 he is an deme stile z ouers an die bluomen cuomen .
 13,11 an deme alle lude horent iren urumen .
 13,12 Die wort eines mannes de alsus uollecuomen is .
 13,13 beceichenent die bladere alse ouerst des stilis
 13,14 Der is lutzal inde si sint dar zu cleine .
 13,15 want siner worde is lutzal . inde si sint houesch inde reine .
 13,16 Jch wenen dat de p-phete alsus uerre was braht .
 13,17 de da sprach “ich hauen minen munde eine hude gesat
 13,18 dat ich bin alse ein stumme worden .
 13,19 dat ich niet unmuzich in werde an den worde- .”
 13,20 alhie Sprich van deme suigene
 13,21 Hi sal man mirken dat de selue man dise maze bat .
 13,22 den de allen dingen heuet maze gesat .
 13,23 he sprach “herre got setze eine hude uer minen munt .
 13,24 dat niman uan minen worden werde wnt”

13,25 Dise maze hilt unse suoze meiste'r inde use herre .
13,26 want he dede selue na siner lere .
13,27 He hadde da uure bit des wisen mannes mu-de gesprochen .
13,28 "an uile worden in mach sunden niet gebrechen"
13,29 dar umbe was he an allen sinen uuorden zuhtich inde curt .
13,30 also it allen heiligen luden ce duone geburt .
13,31 Dit macht tu allerbest mirken an siner martilien .
13,32 da die rode rose lerede die wize lilien .
13,33 Vvilt du ulizliche horen wi de ewanglista sprichet .
13,34 ich wenen dat dir din herce brichet .
13,35 Du de suze Jesus stunt uur deme bisschoue der iuden .
13,36 he begunde on uragen bit manicher reden .
13,37 De suze gebundene Jesus he ne gaf ime eingeine antwerde .
13,38 also dat is si alle wnderde .

14,1 Die ualsche gezuge si sprachen wider on sere
14,2 wane dat suze lamp stunt also it dof were .
14,3 it stunt also ein stumme inde sueich .
14,4 durch mine mi-ne iemerliche inde bleich .
14,5 Dat eweliche wort it in sprichet niet .
14,6 mirket alle gelouigen inde sit .
14,7 He is stum de aleine spreche- can .
14,8 he suiget also ein schuldich inde ein uerduaset man .
14,9 Ze lezt du he doch solde inde wolde sprechen .
14,10 bit uile curten worden wolde he sine stille brechen .
14,11 bit curten worden sprach he die warheit .
14,12 volget ime sine lilien als e uch hat geleit .
14,13 Setzet ure zungen in also gedane hude .
14,14 uerwonnet bit suigene der bosere ungemuode .
14,15 Jt in is ingein dinc lihtere dan dat si suigent .
14,16 den dere herce in senftmuodicheide ligent .
14,17 Ein ander suigen is dat cuomit van grozeme zorne .
14,18 da die bose hercen ligent in des ungemuodes dorne .
14,19 On were michel bezere dat si sprechen .
14,20 dan si sich an on seluen also harde wrechen .
14,21 Dar umbe de spreche- sal he spreche gezogenliche
14,22 de suiget . he suige uerdoldicliche .
14,23 Has tu guode wort inde gut gemude in beiden side- .
14,24 so maht tu beide suigen inde spreche- wale geliden .
14,25 Jch willen suze sele . dat tu Jesum in din herce leges .
14,26 ih-m den suozen den du so senfte dreges
14,27 also also he du sueich inde niet in sprach .
14,28 du he also ein stumme deme ualscheme urcunde underlach
14,29 Lerne uerdragen bit Jesus . it gif ime grozen danc .
14,30 dat he die ualsche urcunde allererst dur dinen willen dranc .
14,31 Luget man up dich durch sinen wille .
14,32 vrowe dich sere inde suich erkers al stille
14,33 Din suigen is diner uiende martilie .

- 14,34 in du salt dat aue bluen alse die lilie .
14,35 Di selicheit is dir en deil gedan .
14,36 die he den sinen gelouede . bit worden sus gedan .
- 15,1 “Jr sulet selich sin alse uch die lude sulen hazen .
15,2 inde durch minen willen sulen uch uerwaze- .
15,3 vrowet uch sprechen ich inde sit vro .
15,4 want ur lon salt groz sin inde ho .”
15,5 An dit gelouede salt du din herce hangen .
15,6 dich sal na deme lone uerduldicliche uerlangen .
15,7 De gelouere he is warehtihe .
15,8 he is mehtich . riche . inde willich .
15,9 Din schoz he si erker wit inde gereit .
15,10 he sal dir geuullet werden . weme lif ove leit .
15,11 Mugen dich diner uiende zungen here zuo bereit gemachen .
15,12 in salt du dan niet vro sin inde van hercen lachen .
15,13 Si in wozen des niet wi sere si dir vrument .
15,14 ein iwelich wort sal alse eine gomme zuo diner cronen cuomen .
15,15 Jch wenen alse du dragende wirdes die crone der eren .
15,16 du woldes dat der worde me gewesen were .
15,17 Dat golt diser cronen sal dine stille wesen .
15,18 dat siluer sulen dine gude wort geuen .
15,19 Des goldes sal uile sin des silueres sal gebrechen .
15,20 want du salt michel me suigen . dane sprechen .
15,21 Nu sich wi manigen stein du willes in diser cronen dragen .
15,22 also manich scheltwort muozes du hi uerdrage- .
15,23 Dit siluer inde dit golt inde dese gesteine .
15,24 si sint uile uerre van einander gescheiden .
15,25 Sulen wir si vaste zesamene brengen
15,26 ich wene- dat uur der minnen sal dan ouen intfengen .
15,27 Din uerduldich herce sal den ouen wesen .
15,28 da inne mach dat suze uur wale weren .
15,29 De smit diser cronen is . der heilige geist .
15,30 he smidet bit deme hamere des widermuodes allermeist .
15,31 Jn vorte den hamer niet also sere
15,32 want he hat die munze dines suzen heren .
15,33 Du sal den blasbalch die gunst des heiligen geistes uernemen .
15,34 de dir sal den starken wont der guoder andehte geuen .
15,35 Alse der wont der guoder andaht . dit uur der minnen beweget .
15,36 so uerdiesci si dat si rehte leuet .
15,37 Du in salt disen wisen smit durch sinen harden hameren niet begeuen .
15,38 wilt du van deme geiste geisteliche leuen .
- 16,1 Sich erker dat du haues den anualz der uerduldicheide .
16,2 so mach du den hamer intfain bit sicherheide .
16,3 Jch bin uerre uzer der materien getreden .
16,4 die minne uerdruch mich . du muost mir t uergeuen .
16,5 Wane du ich die zutige wort . inde die stille louen wolde .

- 16,6 ich wenen dat ich ireme lone ze rehte uolgen solde .
16,7 alhie Sprich van den suilen der stolzcheide
16,8 Nu willen wir uns wider an unse rede wenden .
16,9 inde sin wi der lilien bladere de groze suilen uersuenden .
16,10 Die suilen sint die stolze gemuode .
16,11 da inne losschet dat eiter der unduogede .
16,12 Nu sin wir . wi man si muge brechen .
16,13 wat worde man zu den gesualten gemuden sule sprechen .
16,14 Alle die stolzen inde die zorniche lude .
16,15 hauent alle gesuollene inde getruntene gemude .
16,16 Van der girden is ouch dat herce gesuollen .
16,17 dat ingein richedum in mach eruollen .
16,18 Sich oue dise bladere sin it sere louelich .
16,19 die dise suilen heilent alsus dotlich .
16,20 Ein dotlich suere is die stolzheit
16,21 die der selen den doit ane deit .
16,22 Nu sin wir wi man den muge uerdriuen .
16,23 uan dere sichere selen liue .
16,24 Dit sin wir allerbest an deme meistere der otmudicheide .
16,25 oue wir willen uolge- sine guden geleide .
16,26 Hore wi he sine iungere lerede .
16,27 du si de suere der stolzheide besuerede .
16,28 “Man pliget des in der werelde sere .
16,29 dat man den cuonigen budet here .
16,30 inde si heizent die walededich .
16,31 die uuer si sint geweldich .
16,32 Jt in sal under uch niet wesen ho . he si uch allen zuo dinene gereit .
16,33 so mach on erheuen sine ot otmudicheit .
16,34 Alse des menschen sun in is niet cuomen dinest ze nemene .
16,35 wan anderen luden dinest ze geuene .
16,36 Uuant alse ir selue muget pruuën .
16,37 wi ich mich under uch an deme dineste uuen .”
16,38 Dise wort gaf he sinen iungeren de suoze lerere .
16,39 alse de up eine suile leget der lilien bladere .
- 17,1 Sit wi groze maht hadden dise bladere .
17,2 die de stolzheit uerdriuen also sere .
17,3 van den herzen der guoder iungere
17,4 inde leiden si in den wech den si lerede .
17,5 ir suze meister inde ir here .
17,6 Dise bladere sal de gerehte mensche hauen .
17,7 bit den he die sichen muge lauen .
17,8 inde gewinnen den die otmudicheit
17,9 die besueret sint van der stolzheit
17,10 Diser bladere macht du uile gewonnen .
17,11 wilt du die heilige schrift vernemen bit sinnen .
17,12 nemelich dat ewangelium
17,13 da du uindes den otmudigen Jesum .

- 17,14 die sich otmudichde bize an den doit .
17,15 dat he dir beneme des dodes not .
17,16 Jt is der erden uile schemelich
17,17 alse si erkennet got also otmudich .
17,18 Du in mohtes niet genesen wan bit godes otmudicheit .
17,19 ware wilt du dan gevaren bit dinre stolzheit .
17,20 wi wilt du stolz cuomen zuo deme riche .
17,21 danne der stolze engel muste entwichen .
17,22 Sich wi suar die stolzheit si .
17,23 die in deme vasten himele niet in mohte wesen vri .
17,24 Si muste durch den starken himel vallen .
17,25 in dat afgrunde . bit iren uolgeren allen .
17,26 Den wech de dar widere dich mach geleiden .
17,27 den in maht du niet behalden . dan bit der otmudicheide .
17,28 Eine curte lerunge is dat .
17,29 die otmudicheit climbet in der stolzheide . stat .
17,30 die stolzheit sal genidert werden .
17,31 bize an den bernenden grunt der erden .
17,32 Vues erheues du dich erde inde essche .
17,33 wi has tu dines aneginnes inde dines endes uergezen .
17,34 Gedenke wat du weres . inde wat du sules geworden .
17,35 inde erheue dich dan na dineme werde
17,36 Jch wenen dat it wiere dage ergein na dinem dode .
17,37 die dich nu erheuent die sint dich dan uile node .
- 18,1 Dines selues urdeil wirt dan gendit uuer dich .
18,2 vil arm mensche wes erhuffes du dich .
18,3 “Vva is min guot inde wa is min erue .
18,4 o wi wi engetrue sint mir mine eruen .
18,5 Vva is min vleisch des ich so wale plach .
18,6 deme ich in dede ingein ungemach .
18,7 o wi wi is it den wrmen ein deil gedain .
18,8 o wi siner schoheide die alsus solde ergan .”
18,9 Dise clage si wirt leider alze spade .
18,10 dar umbe alse man die zit hat so uolget rade .
18,11 inde gesinnet . inde vondet genade .
18,12 Aldus gedane bladere sal man up die gesuollene hercen breiden .
18,13 dat si brechen inde uerlisen den wont der stolzheide .
18,14 alhie Sprich van deme zorne
18,15 Ein ander engestlich suile heizet der zorn .
18,16 die is i- des dumben menschen hercen ein mulich dorn .
18,17 want alse de wise man sprichet .
18,18 de zorn in des dumben hercen stihet .
18,19 Dis dorn in lezet nimanne ingeine raste hauen .
18,20 de selige de on wale uz mohte gegrauen .
18,21 Here zuo is och nuoze der lilien blat .
18,22 oue it up die suile rehte wirt gelaht .
18,23 Vuir keren uns euer an den spigel aller duogede .

- 18,24 inde sin wi he sine wort here zuo uugede .
18,25 De suze Jesus quan eines in eine stat .
18,26 da he alze uergeues herberge bat .
18,27 Maht du dit ane rue in dineme hercen uerbergen .
18,28 duo de arme Jesus niet in mohte geherbergen .
18,29 Erbarme dich noch uuer den armen gengelere .
18,30 so wirt noch vrolich sin herberge .
18,31 He nimet die herberge noch gernere dan du .
18,32 he suchet noch wa sin houet muoge hauen ru .
18,33 He wilt ecker di- herce hauen .
18,34 da inne maht du on wermen inde lauen .
18,35 Des ime die bose lude nit in gunden .
18,36 want si der gude an on seluen nit in uunden .
18,37 Des uurden erzurnet die iungere .
18,38 inde sprachen ane den suzen here .
- 19,1 “Vvilt du wir spreche- deme himelisscheme uure .
19,2 dat it uercere dise bose gebure .”
19,3 Dise wort waren des zornes ein zeige- .
19,4 den de guode meister wolde beweichen .
19,5 He sprach “ich in weiz wat geistes in uch leuet .
19,6 de ur gemuode alsus bewegeet .
19,7 Ir sulet wizzen dat ich cuomen bin .
19,8 niet durch imannes uerlust wan umbe gewon .
19,9 inde dat ich die suche inde heile
19,10 die deme uiende waren worden ze deile .”
19,11 Dit was ein guot lilien blat .
19,12 up siner iungere zorn lahte he dat .
19,13 inde brach die suile der mide .
19,14 inde satte ir hercen in senften vride .
19,15 Jch willen dir ein ander blat wisen .
19,16 dat must du inde salt van rehte prisen .
19,17 dat de suoze Jesus sprach du he uerdruich .
19,18 den bosen schalc de on zuo sinen backen sluch .
19,19 Ein undure schalc sluch den cuoninc van himelriche .
19,20 sich wat iamers diseme muge gelichen .
19,21 Hedde on doch ein geweldich mensche geslagen .
19,22 min hrrce mohte it desze baz uerdragen .
19,23 Vuan de suze here uerdruich it baz dan ich .
19,24 want he was van hercen senftmudich . inde uerdoldich .
19,25 Dat uernom an siner antworde .
19,26 die zuo sineme hercen rehte gehorde .
19,27 He sprach “bezugit mich han ich ueele gesprochen .
19,28 so sprechen ich wale . war umbe has du dich an mir gevrochen .”
19,29 Jnbarmet uch alle die oren haue-t .
19,30 alle die einiche minne zuo der minnen dragent .
19,31 Lizet dit wort uren zorn cebrechen .
19,32 sowanne ir uch an imanne willet urechen .

- 19,33 De sich vrenchen mohte wale bit rehte .
19,34 he liz sich ungevrochen an eineme boseme kenehte .
19,35 Alsus gedane wort brechen des zornes suile .
19,36 du maht dere lesen an deme suozeme Jesu uile .
19,37 an der ein willen wir uns noch keren .
19,38 dat he sprach an deme cruce vor sine crucigere .
- 20,1 Hore mirke . inde behalt wat he sprach
20,2 du he leit dat dotlich ungemach .
20,3 du on die nagele sere bunden .
20,4 an sinen viere iemerlichen wonden .
20,5 He sprach “vader uergif it disen die mich martelen .
20,6 want si ne wizen nit dat si sundegent .”
20,7 Dit is ein blat dat uuer alle bladere geit .
20,8 dit blat dreget die uolle heilicheit .
20,9 Din herce is alze umbereit .
20,10 deme dit wort in dat herce nit in geit .
20,11 Vvider allen zorn inde al ungemuode .
20,12 so mach dit blat zonen sine gude .
20,13 Lege it in din herce inde halt it sere .
20,14 dat de suze Jesus bat uor sine crucegere .
20,15 wa-t si selue nit in becanen
20,16 wi groze sunde si an sich wanden .
20,17 Du salt wosen alse dir iman ueele deit .
20,18 wiste he wat pinen na den sunden geit .
20,19 inde hedde he sich ze einem male besut .
20,20 he in spreche noch in dede dir nimer nit dane guot .
20,21 Vva-t dat sprechet de suze Jesus werliche .
20,22 sowe sineme euenkirstene “affe” sprichet .
20,23 he is des hellischen uures schuldich .
20,24 her na berihte sich ein iwelich . inde laze sinen zorn uaren .
20,25 wilt he sine sele bewaren .
20,26 He lerne och so suze wort sprechen .
20,27 dat he eines anderen zorn muoge cebrechen .
20,28 he bidde och uor die on hauent erbolgen .
20,29 wilt he des suzen Jesus lerunge uolgen .
20,30 inde neme in sinen herce dat it on cuomit van dumbenheide .
20,31 die ime dunt oue sprechent leide .
20,32 want si sich uan der hellen nit in willent scheiden .
20,33 da der zorn hine leidet .
20,34 alhie Sprich van der girdeN
20,35 Die dritde suile is die leide girheit .
20,36 dere uil na ingein mensche intgeit .
20,37 si hat beuangen allet ertriche .
20,38 ich in weiz ingeine ire geliche .
- 21,1 wa-t it in is niman he in wille riche sin
21,2 man . inde wif . die alden inde die cleine kendelin .

- 21,3 Alle willent si dat guot hauen .
 21,4 van der wigen bize zuo deme graue .
 21,5 Jnde die maze saite he ime cuome i einich man .
 21,6 de guodes i einich deil gewan .
 21,7 Vuant bit deme guode weset de unmeziche mut .
 21,8 de imer ginende is uppe dat unseliche guot .
 21,9 Jnde in sint nit dat dit gelucke is ungeluckich .
 21,10 inde dise selicheit is unselich .
 21,11 want si die sele van der warer selicheide .
 21,12 inde uan deme rehteme gelucke scheident .
 21,13 Wa-t dit is des suzen Jesus lere .
 21,14 “it in mach niman dinen zuein wideruordigen herren .
 21,15 Jr in muoget nit dine- gode inde der richeit .”
 21,16 die so manige sele hat uerleit .
 21,17 die nimer in wirt zuo gode bracht .
 21,18 oue alle heiligen detden alle ire maht .
 21,19 want uan der hellen in is ingeine widervart .
 21,20 we ime de eines da uunden wart .
 21,21 wa-t he sal imer uallenden sin .
 21,22 dat erue sal imer wesen sin .
 21,23 Sin schaz sal on imer zuo deme afgrunde wigen .
 21,24 dat he nimer in muoge stille geligen .
 21,25 Dit is de engestliche suile .
 21,26 die der dumber lude bedruget also vile .
 21,27 Dise suchede maht du wale uerwinnen .
 21,28 wilt du des suzen Jesus leuen lesen bit sinne .
 21,29 Sich wi arm he in dise werelt quam .
 21,30 du he dines uleissches roc an sine gotheit nam .
 21,31 Sich wi arm was allet sin leuen .
 21,32 also wir muogen an sinen worden uernemen .
 21,33 Die wort si sint iamers uol .
 21,34 want he sprach “die uusse si hauent ire hol .
 21,35 die uugele hauent ire nost bescheiden .
 21,36 da si der rasten muogen inne beiden .
 21,37 des menschen sun he in hat der stede ingeine
 21,38 da he sin houet anne geleide .”
 21,39 Dar na sich dat allerarmeste ende .
 21,40 da ime gebu-den waren beide die uuze inde die hende .

 22,1 da he nacet stunt bedalle .
 22,2 in deme spotte inde in deme schalle .
 22,3 Hi willen ich dat du uues dinen gedanc
 22,4 inde an on driues din herce ane wanc .
 22,5 inde durchmirkes dat schentlich armuode .
 22,6 dat de suze Jesus leit aleine durch sine guode .
 22,7 inde dat du riche wrdes .
 22,8 sich ecker wi du ime des antwrdes .
 22,9 Bruue dat he noch schande in uorte noch ungemach

22,10 he in wrde arm durch din gemach .
22,11 inde in schone dineme gemache inde diner eren nit so sere .
22,12 du in geldes gezwat deme suozeme Jesu . dineme lerere
22,13 He in biddet dich nit also uile liden alse he leit .
22,14 sin cruce it were dir harde uile alze breit .
22,15 he biddet dat du ime aleineme dat herce geues .
22,16 inde dat du na der werelde nit in streues .
22,17 he in mach bit ingeime gesellen sin .
22,18 aleine mach he inde wilt he wesen din .
22,19 Bit ime mach dir inde sal dir wale genugen .
22,20 wilt du die sachen rehte wegen inde pruuen .
22,21 Ane on so in maht du nimer riche werden .
22,22 ane besezes du den himel inde die erden .
22,23 Gewinnes du och inen aleine .
22,24 so in dart du nimer armuode geweinen .
22,25 want he in cuomet nit aleine .
22,26 de suze cuoninc inde reine .
22,27 sin uader cuomet bit ime . inde die elige geist .
22,28 inde die schare der duogede allermeist .
22,29 die brengent die unzeliche uolleist .
22,30 Dusgedanen gast is it guot inde suze intfan .
22,31 inde bose geste bit aller der mahc uz slan .
22,32 Dis gast he is allen den gereit .
22,33 die ime die herberge hauent bereit .
22,34 Des giuet he selue urcunde .
22,35 bit sines druden Johannes munde .
22,36 “Jch stan” sprichet he “zu dere dure inde cloppen .
22,37 inde sowe mir sine dure willet machen offen .

23,1 alse he gehoret mine stomme .
23,2 ich sal zu ime gan dar inbonnen .
23,3 inde ich sal bit ime ezen inde he bit mir .”
23,4 wrde uns dis gast wi riche weren wir .
23,5 wir solden wale werden gespiset .
23,6 a ha wiliche mursel uan sineme dische risent .
23,7 wir sin ecker wat wir ime ane rihten muge- .
23,8 he is otmodich ime mach lihte genugen .
23,9 Jch wenen he wilt dinen willen hauen .
23,10 ane is he cranc . du maht on doch da mide lauen
23,11 Wider diseme willen sal he dir sine genade geuen .
23,12 da mide uolget dat ewige leuen .
23,13 Dit is die himelissche richeit .
23,14 dere ingein ander schaz gelichet .
23,15 Der ane salt du dine gerunge legen .
23,16 ingeine ander girde salt din herce bewegen .
23,17 So maht du lihte uor der bosere girheide genesen .
23,18 inde sicher an der genaden godes wesen .
23,19 Jch wenen sowen dis ezens wale geluste .

23,20 an ime solden steruen alle vleissliche geluste .
23,21 want sowanne sich die himelsche gelust in dat herce lechte .
23,22 ich wenen dat die werelt ire gelust alze uergeues brehte .
23,23 Susgedane wort sal man up die suile breiden .
23,24 dat in die bose girde hat ir uergifnisse geleidet .
23,25 Alhie ane Sprich va- de- wize- bluom- va- deme erste- blade
23,26 Svze Jesus ich keren mine oge- euer an dich .
23,27 want di burden si besueret mich
23,28 Mine ogen sint mir sere uergangen .
23,29 inde dar umbe willen ich an dir hangen .
23,30 wa-t du bis dat ware lith .
23,31 dat dine uolgere in uerleidet nith
23,32 Geleide bit dineme lithe mine sinne .
23,33 wa-t ich uan mir seluere duster bin .
23,34 Vuant du bis guot inde richliche milde .
23,35 ane si ich arm inde genode .
23,36 Gif mir suze uader dine sture .
23,37 dat ich spreken muoge uan dineme uure .
23,38 dat is dine suze minne .
23,39 dar zu eruulle mine sinne .

24,1 Jch bin bit diner helpe cuomen .
24,2 an der lilien wize bluomen .
24,3 an wen die sesveldige sache bezeichent is .
24,4 war umbe du suze here ze minnene bis .
24,5 Der bladere an der wizer blumen . sint sesse .
24,6 an einer iwelicher lilien die uolleweset .
24,7 Bit den sint sesse sachen bezeiche-t .
24,8 die uns an des suzen Jesus minne beweichent .
24,9 Dat erste blat bezeichent die erste sache .
24,10 die is dar umbe dat he uns hat gemachet .
24,11 Jn diseme blade lises du die groze werdicheit .
24,12 die dir gegeuen hat die gude gotheit .
24,13 Hi sal du mirken zua sachen .
24,14 wie inde war u-be he dich hat geschaffen .
24,15 Diner selen gedene is uile herlich .
24,16 want si is edelich .
24,17 dat hauen ich da uure bescheiden .
24,18 da ich sagede uan der selen driueldicheide .
24,19 dat is uan der driueldiger maht .
24,20 die si na der gotlicher driueldicheide hat .
24,21 want alse an deme uadere . inde deme sone .
24,22 inde deme heiligen geiste .
24,23 is gewalt . inde wisheit . inde guode
24,24 also hat eines menschen sele die seluen dri dugede .
24,25 Uuant si hat an ire die wisheit .
24,26 dat is des guoden inde des bosen eine bescheidenheit .
24,27 So hat si och die gude .

- 24,28 dat si mach minnen dat guode .
24,29 Si gewalt is die dride macht .
24,30 da mide die sele dat bose uerdriue- mach .
24,31 Alsus is die sele geschaffen na godes bilde .
24,32 si were selich die dat wale behilde .
24,33 die sich bit den suarcen sunden niman beschriue .
24,34 dat si dit schone bilde mide uerdriue .
24,35 alhie Sprich van deme anderen blade der lilien
24,36 Den lichamen hat dir och got gegeuen .
24,37 den he geschuf uan der ungeschaffenre erden .
24,38 mirke wi groze cirheit he dar ane hat gelaht .
24,39 oue du pruues allerlidelich na siner maht
- 25,1 Jnde dat wizes dat he den lichame .
25,2 dir durch groze minne hat gedan ane .
25,3 dar u-be dat du desze otmuodiger sis .
25,4 alse du dines lichamen crancheit sis .
25,5 des der engel nit in mohte sin .
25,6 du he ane sach sinen grozen schin .
25,7 ei wie wale were geschit siner stolzeit .
25,8 hedde he gehad des uleisches otmuodicheit .
25,9 so in dorste he nit begert hauen der unmeziger eren .
25,10 alse he gesin hedde wie nider he were .
25,11 Dar umbe du der engel nit in bestunt .
25,12 de ingeine sache an ime druch .
25,13 die on mahte uideren an sineme gemuode .
25,14 got he machede den menschen durch sine guode .
25,15 dat he bit des uleisches otmuodicheit .
25,16 uerwne des geistes stolzheit .
25,17 Umbe dise rede is dir de roc des uleisches ane gedan .
25,18 minne got her umbe wilt du it rechte uerstan .
25,19 Dit han ich alsus gesprochen ze dude .
25,20 durch ezeliche dumbe lude .
25,21 die gode nit in willent danken .
25,22 alse si sint iren lichamen cranken .
25,23 inde in sint nit dat an der crancheit des uleissches .
25,24 liget de groze sterkede des geistes .
25,25 Nv sich wie grozer minnen got si wert wider dich .
25,26 de dich hat gemachet beide her inde otmuodich
25,27 An diner selen liget dine hereit .
25,28 an deme lichamen dine otmuodicheit .
25,29 du in mohtes nimer baz geschaffen sin .
25,30 spriches du it anders dat unreht it is din .
25,31 Zu der stat der dumber engele .
25,32 hat he dich betirnet in deme him-ele .
25,33 dat du da imer sinen lof songes
25,34 oue du selue hi . leuende dar na ronges .
25,35 Dit is die erste sache dar umbe du got salt minnen .

25,36 die andere sache salt du och mirken bit allen sinnen .
25,37 Den guoden got in duhte nit genuch .
25,38 dat he dich den anderen craturen uore druch .

26,1 he ne wolde dich nochda- me eren .
26,2 inde sette dich allen sinen gescheffeden einen heren .
26,3 Vuilt du dis rehte wis werden .
26,4 so mirke den himel inde erde .
26,5 Sich dat dat dine hudere sint die engele
26,6 die godes antlize beschoent in deme himele .
26,7 Die sunne der mane . in dat gestirre .
26,8 in mugen sich uan dineme dineste niet geuirren .
26,9 si sint bit ireme dineste din .
26,10 want si geuent dir iren schin .
26,11 Die luft is dir ze dinene gegeuen .
26,12 want ane si in mohtes du nit leuen .
26,13 wie dir die erde si underdan .
26,14 des in mach niman ingeinen zuivel han .
26,15 Vuat nuotzes du des wazeres haues .
26,16 dat weist du so du dich wessches oue laues .
26,17 Dit sint dir vir donc da die werelt ane besteit .
26,18 die dinet dir mit allen den dingen die si umbeueit .
26,19 Naht inde dach sint dir gemachet .
26,20 zuo dineme nutze inde zuo dineme gemache .
26,21 Der dach he luhtet dir zu diner arbeit .
26,22 die naht is dir zu diner rasten bereit .
26,23 Jnde wat mach ich nennen alle sachen .
26,24 alle dinc sint durch dinen willen geschaffen .
26,25 Vvant die engele in dorten der werelde nit .
26,26 die alle zit ane sint iren heren . dat ware liht .
26,27 Vvi groze minne du gode her umbe schuldich sis .
26,28 dat maht du selue pruen bis du wis .
26,29 Bruue inde minne den grozen heren .
26,30 de dich hat gemachet zuo also grozen heren .
26,31 inde want he dich hat gemachet alsus wert .
26,32 dines du ime des is he wale wert .
26,33 Vvant wolt du siner creature dinest nemen
26,34 so salt du ime billiche dinen dinest geuen .
26,35 dat du gode sis also underdan .
26,36 alse du sine gescheppnisse . wilt under dir han .
26,37 Sich wi unbillich dich dat duhte .
26,38 van deme uure inde uan der luhte .

27,1 inde och uan deme wazere inde uan der erden .
27,2 oue si sich uan dineme dineste kerden .
27,3 michel umbillicher salt it dunken unsen scheppere .
27,4 dat du dich uan ime keres .
27,5 want du wolt die werelt hauen zu dineme gemache .

- 27,6 die du ingeine wis niet in has gemachet .
27,7 inde du in wilt nit dinen dineme heren .
27,8 de dich geschaffen hat zu sinen eren .
27,9 Sich och dat die werelt der herre du bis .
27,10 ingeines lones an dir wardende in is .
27,11 wan du beides grozes lones .
27,12 van dineme heren . der ewiger cronen .
27,13 Vuilt du dan dat alle dinc zu dineme dineste sin bereide .
27,14 die ingeines lones an dir beiden .
27,15 wi sere salt du dinstetich sin deme .
27,16 van deme du so suzen lon denkes nemen .
27,17 Din dinest sal sin ze uordes dat du on minnes .
27,18 van aller diner maht . inde uan allen dinen sinnen .
27,19 Ei wie suzein sons is die reine minne .
27,20 die nit in rouet wan machet riche die sinne .
27,21 Sowe sine minne nit in wilt gode geuen .
27,22 wanne geue he allet sin gut inde sin leueN .
27,23 Alhie ane Sprich va- deme dritden blade der lilien
27,24 Dat dride blat dat is die dride sache der minnen
27,25 it mach din herce noch me uerwinnen .
27,26 want dat blat beceichent die groze uerdulheit .
27,27 die got kerde zu des menschen bosheit .
27,28 want du der mensche sich hadde geworpen in die sunden .
27,29 bit rehte mohte on got werpen zuo deme hellisscheme grunde .
27,30 inde zuo deme ewilicheme uure .
27,31 da ime die losunge were dure .
27,32 wane des i- dede he nit zehant .
27,33 biz he ime bude allererst die hant .
27,34 siner barmehezicheide .
27,35 oue he sich lihte kerde wider an dat geleide .
27,36 sines suzen schepperes .
27,37 die on hadde geschaffen zu allereres .
- 28,1 Vvant dat uinden wir gescriuen stan .
28,2 dat Adam du he die sunde hadde gedan .
28,3 he barch sich under eines bomes risen .
28,4 alse on niman da in solde gode wisen .
28,5 he was schire zuo eineme doren worden .
28,6 du he wart ungehorich godes worden .
28,7 de was geschaffen in so grozer wisseit .
28,8 inde uiel so schire in so groze dumbenheit .
28,9 Noch duo in begaf on got nit na deme ualle .
28,10 want he geruhte bit ime callen .
28,11 inde sprach "Adam wa bis tu ."
28,12 alse he spreche "bekenne dich nu .
28,13 in wie grozeme iamere du bis bewangen .
28,14 want du min gebot has uuergangen .
28,15 sich van wie grozer selicheit .

- 28,16 du sis geuallen in dise iamercheit .”
28,17 Dise maninge giuet he noch allen den sunderen .
28,18 nochdan dat si sich van ime durren keren .
28,19 He uerdreget sine smaheit so gutliche .
28,20 he beidet . inde manet dich dicke uederliche .
28,21 inde in vrichet sin unreht niet schire .
28,22 dat he dine minne also uerdine .
28,23 Alhie Sprich va- deme vierden blade der lilie
28,24 Vernom wi wale he diner minnen si wert .
28,25 dere he also maniche wis begert .
28,26 Want uns in beweget nit so sere zu der minnen .
28,27 also dat wir sin dat man uns beginnet minnen .
28,28 Dat herce it is uercaldet sere .
28,29 dat nit in minnet sinen minnere .
28,30 nochdan dat he uile crankere is .
28,31 wan du du da geminnet bis
28,32 Minne got de dich geminnet hat .
28,33 minne du minne dat is mi rat .
28,34 du minne hat sich seluen an dich gedragen .
28,35 du i- salt ire dine minne nit uersagen .
28,36 Sowe bekennet dat in got uerdolet hat .
28,37 inde uerdragen na siner missedat .
- 29,1 zuo deme hat got rehte sache .
29,2 da he siner minnen sin herce mache .
29,3 Diser minne- in mach sich noch in sal niman intsagen .
29,4 wan de ingeine sunde in daf clagen .
29,5 das in is niman also ich wene .
29,6 wan de nit in qua- zuo diseme leuene .
29,7 Suoze got ich in can dir nimer inuollen danc gesagen .
29,8 dat du mich bizze here has uerdragen .
29,9 uerdrach mich bizze an dat ende miner dage .
29,10 dat ich mine sunden inwollen clage .
29,11 Jich bin zu der uierder sachen der minnen cuome- .
29,12 die sal ich lesen an deme vierde- blade der wizer bluomen .
29,13 gif mir suoze Jesus . dat ich si uolle gesin muoge .
29,14 inde dat ich och si ze sprechene duoge .
29,15 want alle duogede ligent hi .
29,16 of man dit blat luterliche ane si .
29,17 Hi liget der strom der barmherzicheide . die got an uns wolde legen .
29,18 inde uns zuo siner minnen bewegen .
29,19 Sowe hie nit beweget in wirt .
29,20 sin herce hat einen bosen wirt .
29,21 de it an boser hardicheide sterket .
29,22 dat it des cruces pine nit in mirke .
29,23 Js din herce hart also die erde sunder wazer .
29,24 du maht die de trene des suzen Jesus dar in vaze- .
29,25 inde begizen dine durre unnuozze erde .

- 29,26 dat si naz inde bereftich wirdit .
 29,27 Noch is eine andere arcedie .
 29,28 der du node mohtes uercien
 29,29 wie du maht cuomen an dat weinen .
 29,30 of din herce is hart inde steinen .
 29,31 Jch willen dir einen hamer wisen .
 29,32 inde dri beizele die sint iseren .
 29,33 die salt du in din harde herce slan .
 29,34 dat die trene dar uz muogen gan .
 29,35 Dat here cruce mache zu eineme hamere .
 29,36 die beizele sin die dri iseren nagele .
 29,37 die durchgruuen beide hende inde uuze .
 29,38 des guoden Jesus inde den suzen

 30,1 Jn brichet dich diser beizele ingein .
 30,2 so bis du hardere dan de stein .
 30,3 de groz wazer in der wstenien gaf .
 30,4 du on moyses zuirent bit einer gerden traf .
 30,5 Vvane it is ein stein der naturen .
 30,6 den man noch bit iserne noch bit uure .
 30,7 noch bit ingeineme harderme donge .
 30,8 mach gebrechen oue beduonge- .
 30,9 wan bit des cikelines blude aleine
 30,10 nu hore inde uernom wat ich meine .
 30,11 Ein michel starker blut wil ich dir zonen .
 30,12 des du selue nit in maht gelonen .
 30,13 dat is des suzen lambes blut .
 30,14 dat van ime vloz bit starker vlut .
 30,15 dar in salt du din steinen herce legen .
 30,16 so maht du it lihte beweichen inde bewegen .
 30,17 dat dat wazer der trene dar uz vluzet .
 30,18 der dine sele wale genuzet
 30,19 Nu sin wir al uan aneginne .
 30,19a dit vierde blat der suzer minnen .
 30,20 Dise sache der minnen beginnet alda .
 30,21 du uns godes sun quam also na .
 30,22 dat he unse menscheit an sich nam .
 30,23 inde zu uns in dise werelt qua- .
 30,24 Jch willen dat uersuigen . dat he nun made wolde bliue- .
 30,25 beslozen in siner reinere muoder liue .
 30,26 dat moht uns sere zu der minnen driuen .
 30,27 dat die wischeit godes durch uns so lange wolde suigen .
 30,28 inde dat ware liht wolde so lange in uinsternisse ligen .
 30,29 Du salt dat aneginne des cruces bekennen .
 30,30 an der cribben . inde an den armen bende- .
 30,31 Sich den cuoninc des himeles inde der erden .
 30,32 in eine arme cribbe geleget wolde werden .
 30,33 Sich iemerliche he gebunden lach

- 30,34 de unser sunden bende zebrach .
30,35 He winet als ein kint inde bermeliche .
30,36 den die engele horent also vroliche .
30,37 Des himeles vrowede wart unuro in der erden .
30,38 dat du mohtes vro in deme himele werden .
- 31,1 Nu hore mich ein lutzet uort .
31,2 inde uernom eines p-pheten wort .
31,3 bit des zungen got uan himelriche .
31,4 sprach zu dem menschen also uederliche .
31,5 He sprach "ich sal dich zin zu dineme heile .
31,6 bit des sundigen Adames seilen .
31,7 ich sal uch zu mir gewinnen .
31,8 bit den benden den starker minnen ."
31,9 Nu mirker wir dit wort duerliche .
31,10 want ich wenen dat ime cume einich wort geliche .
31,11 dat man lese oue sunge .
31,12 dat uns so an godes minne bonde .
31,13 want dat cruce liget allermeist an diseme curten worden .
31,14 dat zu unser losungen gehorde .
31,15 Alhie Sprich van den seilen Adames
31,16 Nu sin wir wilich sin die Adames seil .
31,17 bit den got zuet uns an sin deil .
31,18 wir sule- och der minnen bende besin
31,19 die uns zu gode sulen zin .
31,20 Du sich adam willen des uergaz .
31,21 inde den uerboden appel az .
31,22 umbe die ungehorsamicheit .
31,23 so wart he uzer deme Paradise geleit .
31,24 inde in diser werelde kerkere .
31,25 verwiset . uzer der erster eren .
31,26 inde wart da bit dron seilen gebunden .
31,27 die uan nimanne in mohten werden intbunden .
31,28 bize got an unse menscheit qua- .
31,29 inde die selue adames seil an sich nam .
31,30 Der erste bant dat was die groze smaheit .
31,31 die Adam in diser werelde leit .
31,32 du he sich dorste keren
31,33 vreueliche uan der erster eren .
31,34 De da uure gode aleineme was underdan .
31,35 he sach dar na sich alle donc uersman .
31,36 also dat he sich einer undugen nit in mohte erwerben .
31,37 de da uure gebot deme wallede uissche in deme mere .
- 32,1 He muste beide wr inde wazer vorten .
32,2 des he da wre nit in dorte .
32,3 du he gode was underdan .
32,4 inde sin gebot nit in hadde noch du uouergain .

- 32,5 Dat ander seil was dat groze armude .
32,6 dat he leit du he sin gemude .
32,7 kerede van der himelscher richeit .
32,8 inde uil i- dit manichueldige leit .
32,9 de eines bomes vruht nit in wolde inberen .
32,10 de anders hadde sowes he mohte begeren .
32,11 Jnde uile rehte uil he in dit armude .
32,12 deme nit in genuogede de riche got inde die gude .
32,13 Dat dritde seil was die suare arbeit .
32,14 die he in diseme kerkere leit .
32,15 want he in deme wnninlicheme gemache .
32,16 nit in wolde eweliche lachen .
32,17 Bit disen dron seilen wart der arme Ada- gebunden .
32,18 du he wart an den ungehorsamicheide wnden .
32,19 dat is bit der grozer smaheide .
32,20 armuode . inde arbeide
32,21 Nochdan zuenueldich is die arbeit .
32,22 die adame inde sine kint noch umbeueit .
32,23 Dat is ze warm . ze calt . hunger . inde durstes not .
32,24 muthnisse suchede . inde ze iungest der doit .
32,25 Dit sint die starke seil die got godes sun an sich nam .
32,26 du he uns zu erlosene qua- .
32,27 inde wolde uur uns gelden unse scholt .
32,28 des he nit in solde hedde he gewolt .
32,29 Alhie Sprich van der arbeide Jesu
32,30 Nu grifen wir an dat erste seil dat is smaheit .
32,31 inde sin wie uile dat he dere leit .
32,32 alse uile alse ni ingein mensche me .
32,33 de sont geboren is oue was . e .
32,34 Jme inbot niman ingeine ere .
32,35 so he doch der engele inde der lude here were
32,36 Vvane uile uerdoldiclige uerdruch sine smaheit .
32,37 dat du in dine ere wrdes wider geleit .
32,38 Vvi sere on der bant des armudes bunde .
32,39 des giuet uns dat ewangelium urcunde .
- 33,1 dat uns uan siner geburde seget .
33,2 “dat kindelin wart in eine cribbe geleget .
33,3 inde bit cranken duchelin umbewnden .
33,4 also wart it uan den hirden wnden”
33,5 He ne was nit richere du he gews .
33,6 want he ne hadde noch die spise noch dat hus .
33,7 Vvi arm he an sineme cruce were .
33,8 des has du da uore ein curte lere .
33,9 want he was nachtet inde bloz .
33,10 da he gare bit sineme blude vloz .
33,11 Dit armude bant on durch dine minne .
33,12 dat du den ewigen richedu- mohtes gewinnen .

33,13 Vvi he gebu-den were bit der arbeit .
33,14 des heues tu geliche ein underscheit .
33,15 alse du die siuenueldige geisele ane sis .
33,16 die machen dich van siner arbeide wis
33,17 Vvi dicke wenes du dat ime alze heize were .
33,18 deme unverdrozeme gengelere .
33,19 Jch meinen Jesum den suzen predichere
33,20 de in maniche- steden spreide sine lere .
33,21 da on in deme heizeme lande .
33,22 die hitze dicke sere durchbrande .
33,23 Jch wene he uch lihte den vorst gewnne .
33,24 want sine cleidere ware dunne .
33,25 Hunger inde durst waren ime heimelich .
33,26 wa-t he ne wolde hi nit wesen weledich .
33,27 up dat unse hunger wrde gesadet .
33,28 inde unse durst gelauet .
33,29 Wi dicke wart he mude uan pretchene .
33,30 van gane inde van wachene .
33,31 He wart so sich inde cranc durch unse minne .
33,32 dat ime niman gelichede al uan aneginne .
33,33 Dis hauen wir maniche urcunde .
33,34 an der ppheten inde an sines selues worden uunden .
33,35 “Sit” sprichet der pphete .
33,36 “i-de mirket uile rehte .
33,37 dat mirke inde sinen iwelich .
33,38 of mineme ruen is iman gelich .”

34,1 Nein it suze Jesv nein it .
34,2 durch mine minne lides du dit .
34,3 dat ingein mensche me in geleit .
34,4 want du bekandes baz lif inde leit .
34,5 O Wi sur is dir mine sele worden .
34,6 want du da alle dinc geschufes bit eineme worde .
34,7 wi manich dinc has du gedan inde liden .
34,8 dat du mich brehtes in den ersten uriden .
34,9 Du wrdes so sere cranc inde so nider .
34,10 dat ich starc queme zuo dir dar wider .
34,11 danne ich arme was geuallen .
34,12 in diser bitterre werelde galle .
34,13 Nu mine sele erschudde dich .
34,14 inde uar zuo deme cruce urolich .
34,15 in laz den suozen Jesum nit alleine stan .
34,16 ruf “suze cuoninc ich willen zu dir gan .
34,17 dine wnden laz beschowen mich .
34,18 wi dif si sin inde wi engestlich .
34,19 Laz mich min herce bit dineme blude begizen .
34,20 dat ich sin uan dineme hercen ulizen .
34,21 Gif dich bit dineme cruce in mine armen .

34,22 laz mich an diner umbehelungen erwarmen .
 34,23 mache mich bit dineme blude rot .
 34,24 bit dir muze ich gebruchen suze brot .
 34,25 biz an minen iungesten dach an minen dot ."
 34,26 Vuilt du mine sele an diseme gemude bliuen .
 34,27 de suze Jesus en is so unsuoze nit dat he dich uerdriue .
 34,28 Vuane du ne salt dat cruce nit so curtliche uouergan .
 34,29 du salt uile muzliche da uoure stan .
 34,30 inde uouerlis al van aneginne .
 34,31 die crancheit der starker minnen .
 34,32 Din herze umbeue den suozen Jesum aleine .
 34,33 he in wilt bit eineme andere nit hauen gemeine .
 34,34 Diner sucheden aneginne si sin bitduungen .
 34,35 inde die iamerliche wort siner suozer zungen .
 34,36 "Jch bin trurich" sprach he "bize an den dot ."
 34,37 nu sich wie he steit in wilicher not .
 34,38 He biuet alse ein espen lof .
 34,39 hie liget diner minnen ein dure conf .

35,1 Her na sich den bludigen sueiz .
 35,2 de sine hut aluueral cereiz .
 35,3 inde lif in die erde bit grozer vlut .
 35,4 al in droffen alse dat rode blut .
 35,5 Sich wi de bose iungere .
 35,6 verredet sinen meister inde sinen heren .
 35,7 HE cussede on uur sinen suzen munt
 35,8 alse he were sin getrue vrunt .
 35,9 Dar na sich die iudissche hende .
 35,10 ane grifen den cuoninc in sineme ellende
 35,11 inde trecken alse einen schechere .
 35,12 den suzen uader . den guode- lerere .
 35,13 Sich dat ime gegeuen wirt manich stoiz
 35,14 bit nide . unsenfte inde groz .
 35,15 Sich aller der werelde rihtere vor den iuden gerihte stan .
 35,16 sich den suozen predichere . zu Pilatus gerihte gain .
 35,17 Sich wa he iemerliche geit aleine .
 35,18 sine vrunt hadden on begeuen algemeine .
 35,19 die hadden gesprochen si ne wolden on nit begeuen .
 35,20 alse lange alse si mohten leue- .
 35,21 Jt in was ingein mensche nit de on troste .
 35,22 oue de on van sineme iamere erlost .
 35,23 Sich wa he uor Pilato steit .
 35,24 inde heldet zuht inde uerdoldicheit .
 35,25 Sich wa man ime sine cleidere uz zuhet .
 35,26 inde sinen suzen lif bit den geiselen so zebloet .
 35,27 dat sin heilich blut an den pilere spranc .
 35,28 da man it noch spuret aver also lanc .
 35,29 Sich wa he wirt den heidinen ein spot

- 35,30 de suze cuoninc de guode got .
35,31 Sich sinen roden roc . inde sine durne crone .
35,32 inde denke wat du ime muges geuen ze lone .
35,33 Sich baz dan ich gesprechen cunne .
35,34 wi dat blut uuer sin antlitze runne .
35,35 wi he geplucket wart bit sinen barde .
35,36 an sinen backen . inde an sinen hals geslage- so harde .
35,37 Sich wa he zu deme cruce geit
35,38 inde dreget dat cruce bit grozer arbeit .
- 36,1 Lof zu hilf ime sin cruce dragen .
36,2 so mach he dine sunden desze baz uerdragen .
36,3 Sich wa man inen euer nachtet machet .
36,4 sliffes du bize here nu intwache .
36,5 Hi geit ane die ouerste not .
36,6 die martilie die brenget den doit .
36,7 Sich wa die unmilde heidenen .
36,8 durchgrauent bit den starken nagelen .
36,9 beide hende inde uuze des grozen heiligen .
36,10 deme himel inde erde muozen nigen .
36,11 O wi wie iemerliche is nu din gebere .
36,12 groze cuoninc suze vater . inde herre .
36,13 Vue hat dich braht in dise iamercheit .
36,14 suze minne wan dine barmherzicheit .
36,15 inde dine minne die dich zu mir hat gedragen .
36,16 we mohte diser minnen maze gesage- .
36,17 Vvat mach ich dir wider diser minnen geuen .
36,18 suze minne . min herce inde min leuen .
36,19 Din is allet dat ich geleisten mach .
36,20 wat mach ich dan dar uuer geuen . ei miner selen dach .
36,21 Nv mine sele beschowe dinen heilant .
36,22 sich wiegedane arcedie he hat . an dich gewant .
36,23 die he selue wolde uutzen also sere
36,24 alse ein getrue arcetere .
36,25 Sich oue he nit des haue gelazen .
36,26 dat dine suchede mohte sazen .
36,27 he nam allet dat an sich .
36,28 da mide he mohte geheilen dich .
36,29 He zonedede sine suchede an siner biuungen .
36,30 he sueizede blut umbe dine bekerunge .
36,31 Yme wart bit den geiselen geschraffet .
36,32 uouer allen sinen lif bit grozeme ungemache .
36,33 He liz zu allen den aderen dat heilige blut .
36,34 dat dir diner sucheden also wrde gebut .
36,35 He machede uinsternisse vuer al ertriche .
36,36 alse die gelazenen plegent i emzliche
36,37 Sich dat he ze iungest uur dich dranc .
36,38 den bittere mirren . gallen . inde eziges dranc .

- 37,1 Nu mirke die ungeuuge vlimenslege .
 37,2 dar in thomas sinen vonger inde sine ha-t mohte legen .
 37,3 Nv sich of he it des vuergangen haue .
 37,4 da mide he dine groze suchede mohte gelauen .
 37,5 Vvat mohte he nu me sprechen duon . oue liden
 37,6 de durch dich ingeine pine in wolde vermiden .
 37,7 Hi in gehorde nit me zu dan der doit .
 37,8 de quam inde quam bit grozer not .
 37,9 Eine cleine pine in mohte nit verdriuen .
 37,10 die suze sele uan deme reineme liue .
 37,11 Jres heren doit in mohte ingeine creature gedragen .
 37,12 wan si musten on alse si solden ze rehte clagen .
 37,13 Dat schein an deme mane- inde an der sunnen .
 37,14 die uan der uinsternisse wrden uerwnnen .
 37,15 Dat wart och offenbare an der ertbiungen .
 37,16 inde an den steinen die al ze stucken sprungen .
 37,17 Vvilich herce hi ganz bliuet it is hardere dan die stein .
 37,18 die sprungen alse si wolden den doden weinen .
 37,19 Weine inde vrowe dich in den trenen .
 37,20 want dir is baz geschit dan du mohtes weinen .
 37,21 Dis dot . inde dise iamercheit .
 37,22 hat dich wider in dat leuen . inde in die vrowede geleit .
 37,23 Dit sint die seil die bunden den alden Adame .
 37,24 die de suze Jesus druch an sineme heiligen lichame .
 37,25 dat he dich hi mide zoge zu siner minnen .
 37,26 in minnes du noch nit . so bis du uerre uan dinen sinen .
 37,27 bit dat du mozes gewinnen .
 37,28 dat geware liht an den ogen inbinnen .
 37,29 dat du muozes uollesin .
 37,30 den suozen Jesum . inde uor sineme cruce ligen .
 37,31 bit dinen warmen . trenen . inde up dinen baren knin .
 37,32 Alhie Sprich van den bande- der minnen
 37,33 Der minnen bende sulen wir curteliche sprechen .
 37,34 dat dich miner worde nit in uermethe .
 37,35 Dit erste bende die den suzen Jesum bunden .
 37,36 han wir bit ime in der cribben uunden .
- 38,1 Din losere lezet sich bonden .
 38,2 dat du vriheit muoges winden .
 38,3 Der ander bant wart ime ane gelaht .
 38,4 du he gebunden wart uur dat gerihte braht .
 38,5 An deme cruce uindes du den dritden bant .
 38,6 an beiden uuzen . inde an iwederre hant .
 38,7 Der erste bant was gemechelich . inde uol otmuodicheide .
 38,8 der ander was uile suerlich . inde uol iamerheide .
 38,9 De vrie cuoninc van himelriche .
 38,10 dreget die bande eime diue geliche .

- 38,11 De aleine bonden inde intbonden mach .
 38,12 lidet an benden unreht inde ungemach
 38,13 Die dritde bende waren dotlich .
 38,14 si daden die sele uan deme lichame scheiden sich .
 38,15 Bit den ersten bant on sin muoder lisliche .
 38,16 bit den anderen . benden bunden on die iuden nitliche
 38,17 bit den lesten benden bunden on die heidenen dotliche .
 38,18 Die erste bende waren linen alse ich hauen uernomen .
 38,19 die andere waren van eineme seile genomem .
 38,20 Die lesten waren hart iseren .
 38,21 die on zu deme dode brahten den suzen heren .
 38,22 Dit sint des suzen Jesus bende
 38,23 die on bunden durch dich in diseme ellende .
 38,24 Bit disen benden sal he dich ze rehte sin
 38,25 we ime de der minnen benden wilt intflin .
 38,26 Jch han angest dat he in bose bende sule uallen .
 38,27 unde sinen uienden werden ze schalle .
 38,28 Vlu in der minnen bende . wilt du vlin .
 38,29 wirdes du dan geuangen . so ne mohte dir nimer baz geschin .
 38,30 Ane dise bende in macht du nimer werden vri .
 38,31 wenes du it anders dir is dat bose geuenkenisse bi .
 38,32 Alhie ane Sprich van deme vonften blade der lilien
 38,33 Dat vonfte blat der blumen is die vonfte sache .
 38,34 die uns manet dat wir zuo des guoden Jesus minnen wachen .
 38,35 Jch han sonnes uile ze cleine .
 38,36 ze sprechene van diser sachen aleine .
 38,37 want ich in mahc nit begrifen bit minem muode .
 38,38 die unzelliche . inde die uederliche guode .
- 39,1 die de suoze vader zuo vns wolde wenden .
 39,2 sowie lange wir sin in diseme ellende .
 39,3 Jme in genugede nit dat he sinen engelen hadde geboden .
 39,4 dat si uns wrderden zuo sinen geboden .
 39,5 inde behuten uns wr aller not .
 39,6 alle unse leuedage biz an unsen doit .
 39,7 die uns huodent al stilliche uor manichen sachen .
 39,8 die uns wan unseme scheppere mohten uerre machen .
 39,9 inde benement uns dicke den bosen willen .
 39,10 de uns mohte dun wider godes willen .
 39,11 Vuer dit allet gaf he uns sine sture .
 39,12 edel inde hupelich ouer alle creature .
 39,13 dat is sinen heligen lichamen inde sin blut .
 39,14 so suze . so reine . so starc . inde so gut .
 39,15 Dit is die spise uan dere is gesprochen .
 39,16 dat wort des min herce is intlochen .
 39,17 Dat is dat der mensche hat gezen der engele brot .
 39,18 dat brot . dat uerdriuet den ewigen dot .
 39,19 Dit is dat brot dat sprach uan ime selueme .

- 39,20 "ich bon dat leuende brot dat quam uan deme himele
39,21 sowe izzet dit brot wertliche
39,22 he sal leuen eweliche .
39,23 wat- dit brot dat ich geuen
39,24 is min lichame . umbe der werelde leuen ."
39,25 Sowe nit in nutzt diser spisen .
39,26 got sal on an deme urdeile uerwisen .
39,27 zuo deme helleschen uure .
39,28 da he in wardit ingeiner sture .
39,29 wat- sowe sich uan sineme heile willendes keret .
39,30 sin unheil sal her na wider sinen willen werdin gemeret .
39,31 Wan dise spise wilt wirtliche genutzt werden .
39,32 o wi we is ire wert up diser erden .
39,33 Dat willen ich dich bit curten worden wisen .
39,34 sowe wr minnet he geit sicherliche zuo diser spisen .
39,35 Has du die minne so sis unreueret .
39,36 want sin antlitze is van dinen sunden gekeret .
39,37 de alda wilt zuo dineme grozen urumen .
39,38 ware got inde ware mensche in dine sele cuomen .
- 40,1 Wat hogecides wenes du dat da si .
40,2 da de himelsche brudeguome siner brut cuomet bi .
40,3 da he sich selue- uindet in der selen hus .
40,4 die ware minne de suze Jesus
40,5 Dit is die meiste werdicheit
40,6 die dir in diseme leuene mohte werden bereit .
40,7 dat ein also groz gast in dine sele wolde cuomen .
40,8 des du heddes so groze ere . inde urumen .
40,9 Sich wes du me mohtes ze rehte begeren .
40,10 des dich de guode Jesus mohte geweren .
40,11 Minne den suzen . want he is so minnesam .
40,12 loue on van hercen . wat- he is so louesam .
40,13 Vue is baz minnen inde loues wert .
40,14 wan de dich so manicher gauen hat gewert .
40,15 der du nit in dorstes hauen begert .
40,16 He gaf dich dir . duo he dich gemachede .
40,17 euer gaf he dich dir . duo he dich widermachede .
40,18 dat is duo he dich van dinen sunden intbant .
40,19 inde bit sineme cruce ledegede van des uiendes hant .
40,20 Jnde want du noch nit in mohtes sicher sin uor deme widerualle .
40,21 he gaf dir sture up den wech sich seluen albedalle .
40,22 wat mohte he dir so grozes geuen .
40,23 also sich seluen dat ewige leuen .
40,24 Vmbe dich seluen bis du dich .
40,25 dineme geuere zuirent schuldich .
40,26 So must du sin scholtgemare bliuen .
40,27 want du in maht dich nit zuirent uergelden bit eineme liue .
40,28 Vvat wilt du ime dan geuen umbe on:

40,29 des werdicheit vouergeit unmezliche allen son .
40,30 Gilt ime also uerre alse du maht .
40,31 minne on uan alleme dineme hercen . inde uan aller diner maht .
40,32 De guode Jesus nimet euene uan deme armen scholtgemaren .
40,33 inde lezet dich ledich zu deme himelriche varen .

41,1 Alhie ane Sprich va- deme sesteme blade d' lilien .
41,2 Dat seste inde dat leste blat der bluomen .
41,3 Dit is uns nuo ze sprechene zuo cuomen .
41,4 Dit blat is der sester sachen ein zeichen .
41,5 die uns aleine zuo der voller minnen mach erweichen .
41,6 Die uurcele diser suozer minnen .
41,7 suolen wir an deme vrolicheme worde vinden .
41,8 dat de guode Jesus sprach .
41,9 du ime bi was siner martilien dach .
41,10 "Jch varen" sprach he "dat ich uch die stat bereide .
41,11 inde ich sal euer cuomen zuo uch . na urer beiden .
41,12 inde sal uch zu mir nemen . dat ich uch geleide .
41,13 dare da ir ingeinen angest in hat uan deme gescheide .
41,14 da in sal ur vro herce nimer truren van ingeineme leide ."
41,15 Heue dich up suar herce . inde uernom dine selicheit .
41,16 die dir din here inde din urunt hat bereith .
41,17 Van diser vroweden in can ich nit gesprechen .
41,18 wan dat niman in can gerechen .
41,19 Vuan dat muogen wir van den buchen lernen .
41,20 dat wir aller iamercheide da sulen inberen .
41,21 Hunger inde durst . warm inde calt .
41,22 wirt da ewiliche nider geualt .
41,23 Sich in sal da nimam wer den anderen erheuen .
41,24 du minne sal uns alle da machen euen .
41,25 Wir sulen da alle cuoninge sin inde riche .
41,26 geweldich in deme himelriche .
41,27 Vvir suolen des guoden Jesus eruegenozen sin .
41,28 wir suolen da drinken den ungemengeden win .
41,29 Dat quit . wir suolen der vroweden da gebruchen .
41,30 da ingeine unvrowede in mach zu geruchen .
41,31 Da sulen die godes liuesten also druncken werden .
41,32 dat si uergezen sowat si liden up der erden .
41,33 De guode Jesus sal alle trene wisschen van iren ogen .
41,34 he sal si bit siner uerborgener suzicheide sogen .
41,35 Wat lihtes sal he iren ogen wenes du da erscheinen
41,36 die in disen dusternissen durch on wolden weinen .
41,37 Vuat suozes sanges sulen die selige selen da horen .
41,38 die in diseme liue hadden cusche inde uerdoldige oren .

42,1 Dat quit . die hi in wolden nit horen einiche vncuscheit .
42,2 inde zu den uientlichen zungen drugen uerdoldicheit .
42,3 Der engele lof suolen si da dar wider horen .

42,4 van den nun uolcuomenen choren .
 42,5 Jnde si suolen och selue mide songen .
 42,6 dat aller der himel sal van vroweden clongen
 42,7 Dat ich noch gesprochen han dat is nit .
 42,8 wir suolen da sin den guoden Jesum dat suze liht .
 42,9 wat schines wenes du dat he selue ane drage .
 42,10 so he van den gerechten selue sage .
 42,11 “Dan suolen die gerechte lude blichen .
 42,12 alse die sunne in ires uader riche .
 42,13 doch ein iwelich na sineme werde .
 42,14 alse he uerdinet hat hi in der erder .”
 42,15 Ein iwelich sal da na sineme cruce schinen .
 42,16 dat is . na sinen duogeden . inde na sinen pinen .
 42,17 Dar na dat din cruce was hie breit inde lanc .
 42,18 dar na sal an deme schine gemazet werden din danc .
 42,19 Na disen worden sal de suoze keiserinne .
 42,20 die crone dragen der allermeister minnen .
 42,21 Weist u wen ich meinen .
 42,22 die suze MARIAM die muoder also reine .
 42,23 Jres sunes cruce in stunt niman also bi .
 42,24 in der bitterer martilien alse si .
 42,25 Dar umbe claget he in eineme ppheten also iemerliche .
 42,26 “ich han des cruces keltere getrede- . also sunderliche .
 42,27 dat ingein man bit mir in besteit .
 42,28 de geliche bit mir liden wolde . mine druuicheit”
 42,29 Dine clage is reht uile suoze erlosere .
 42,30 die si sint alle uan dir gekeret .
 42,31 Jt is ein arm vrowelin die dir gesteit .
 42,32 die dir aleine nit aue in geit .
 42,33 in dere hercen alse ganz din cruce steit .
 42,34 dar umbe makes du si nu sunderliche vro inde gemeit .
 42,35 sunderliche si umbeueit .
 42,36 dine zesue . na der druuicheit .
 42,37 Dise keiserinne in cuomet nit aleine zuo houe .
 42,38 wane si brenget wiz gesinde bit grozeme loue .

43,1 Vvilt du mirken wie wir suolen volgen irer vroweden .
 43,2 du salt eilif dusent sunnen alzemale schowen .
 43,3 Jnde dar na alle die suoze megede .
 43,4 die de keiserinne bewegen sal oue i bewede .
 43,5 bit deme nuen gelouede irer cuscheide .
 43,6 inde bit iren siden sunderlicher reinicheide .
 43,7 Dise suolen alle dragen sunderliche cronon .
 43,8 da mide ir brudegume sal sinen bruden lonen .
 43,9 die crone heizet in latine . Aureola .
 43,10 sunder die megede in dreget si niman da .
 43,11 inde sunder die bluodige martelere .
 43,12 inde die gelouige lerere .

43,13 Deme godes lambe uolget die keiserinne .
 43,14 sowa it hine geit . bit deme wizeme gesinde .
 43,15 da in mach niman geuolgen wan die megede aleine .
 43,16 die an selen inde an liue sint behalden reine .
 43,17 Dis chor singet irem brudeguomen einen nuen sanc .
 43,18 so suoze . so ho inde lanc .
 43,19 stedicliche . gelustliche . sunder wac- .
 43,20 den sunder die megede nit ingein heilige in gesanc .
 43,21 Disen chor rihtet die suoze keiserinne .
 43,22 si leidet den danz si is vorsengerinne .
 43,23 ire stimme is so suoze so suoze .
 43,24 gif suoze muoder dat ich dich schire horen muoze .
 43,25 So singet na de chor suoze inde reine .
 43,26 inde uolgent der sengerinnen algemeine .
 43,27 Si singent in sin herze deme liuen brudeguomen .
 43,28 da si den seluen sanc inme hant genuomen .
 43,29 Selich sint alle die die disen sanc suolen horen .
 43,30 seliger sint si die mide singent in deme chore .
 43,31 dar aleine die reine megede zuo gehoren .
 43,32 Jdoch sal allermenschelich singen sinen sanc .
 43,33 inde sal gode gelden sinen lof inde grozen danc .
 43,34 Vuat vroweden sal da in den inuurigen hercen glommen .
 43,35 also si horent die harpen also manicher scheller stommen
 43,36 MAn sal da singen dat lange dat suoze Allelvia .
 43,37 zuo allen strazen uerre inde na .
 43,38 Vuat wnders it sal wesen Passchedach .
 43,39 also man zuei Alleluia singen mach .

44,1 dat is . also beide lichame inde sele sal gevrowet werden .
 44,2 dat durch got ruich was in diser erden .
 44,3 Da sal ma- gebruchen offenbare .
 44,4 den suozen Jesus den wir hi up deme altare .
 44,5 in des brodes in des wines formen intfen .
 44,6 also lange also wir in diseme vleische gein .
 44,7 Da sulen wir unsen cuoninc beschowen in siner cirheide .
 44,8 des wir in diser dusternisse so lange beiden .
 44,9 Hie liget aller der vroweden ein ende .
 44,10 der wir warden in disen benden .
 44,11 want unse son in mach nit here cuomen .
 44,12 wan zuo deme uadere . inde zuo deme sune .
 44,13 inde zuo deme heiligeme geiste .
 44,14 da liget unse vrowede allermeist .
 44,15 si liget och da algare .
 44,16 de suoze got he helpe uns dare .
 44,17 da he selue unse ogen muoze erluhten .
 44,18 inde sich seluen setzen in unses hercen luhte .
 44,19 dat wir imer muozen schinen .
 44,20 van ime . vor ime . under den sinen .

- 44,21 Hilp uns here dat wir dare zuo der stat gehoren .
44,22 da wir dich suoze cuoninc sulen sin inde horen .
44,23 da uns die groze selicheit sal geschin .
44,24 dat wir dich heimelrichere wan die engele sin .
44,25 wat- du bis narre sibbe unser naturen .
44,26 dan der engelschen creaturen .
44,27 want du bis unse here inde unse bruder
44,28 van des haluen diner seliger muoder .
44,29 Vvir suolen unse mencheit werliche an dir bekennen .
44,30 want wir dich werliche got inde mensche nennen .
44,31 Dit is die suoze heimilicheit .
44,32 die wir suolen hauen zuo diner menscheit .
44,33 die ingeine andere creature han in mach .
44,34 o wi sal imer cuomen de selige dach .
44,35 dat ich dich suoze buole suole gesien .
44,36 inde eweliche an diner umbehelungen lin .
44,37 inde diner suozer cussingen gesadet werden .
44,38 minnesame lamb . leidere der wizer herden .
44,39 Din ruch sal alle balseme werwinnen .
44,40 a ha wat gerungen sal he machen da inbinnen .
- 45,1 in den reinen hercen . in den wisen sinnen .
45,2 der seliger brude . diner cuoninginnen .
45,3 alse si cuoment in der wrce camere .
45,4 in din herce . suoze bruodeguome inde here .
45,5 Die minne sal da nemen ouerhant .
45,6 die uorte sal da werden umbe gewant .
45,7 ma- sal da vroliche gan zuo diner hat- .
45,8 in din milde herce suoze heilant .
45,9 Dine stimme sal man da horen also vroliche .
45,10 dat ire noch engel noch mensche in geliche .
45,11 wat ma- gehoren mach is eine crancheit
45,12 wider diner stimmen suoze wisheit .
45,13 Vuan dine stimme sal spreken in allen die da sin .
45,14 in allen die da schinent sal man siin dinen schin .
45,15 Da sal eruullet werden dat an deme vonften blade gebrach .
45,16 want diner gude sal da gelichen din smach .
45,17 Du bis de selue hie bedecket up deme altare .
45,18 dat du bis in deme himele offenbare .
45,19 wan wir in muogen nit gesmache- der grozer suzicheide .
45,20 die uns da sal smachen na diner mildicheide .
45,21 Suze Jesus geruche uns hie bewaren .
45,22 dat wir zuo dir dare muozen uaren .
45,23 da wir dich den leuigen burnen
45,24 sin . bit deme ewige lihte burnen .
45,25 Vvant du bis de burne da dat liht inne . springet
45,26 alse uns de suoze selme singet .
45,27 Jn diseme lihteme burnen suolen wir alle hercen beschowen .

45,28 beide herren inde vrowen .
 45,29 der wir nu an zuiele sin .
 45,30 weiz got si werdent uns da alle schin .
 45,31 we allermeist an unser minnen duge .
 45,32 o we we unsen dumben wain hie bedrugen .
 45,33 Vvant sowat ich minnen dat is min .
 45,34 so wat an der lude hercen sin .
 45,35 alhie ane Sprich van den bagen .
 45,36 Wuir hauen uouer unse maht gesprochen .
 45,37 inde unsen munt zuo deme himele intlochen .

 46,1 wir muozen euer her nider stigen .
 46,2 inde zuo der erden . bit der lilien bluomen nigen .
 46,3 Dat die ho bluome niget zuo der erden .
 46,4 da mide sal uns beceichenet werden .
 46,5 dat du in dineme hercen imer desze otmuodiger sis
 46,6 so du der duogede hocheit me an dir west .
 46,7 Sowe duogede ane otmuodicheit zesamene leget .
 46,8 he deit also de de puluer wieder den wint dreget .
 46,9 Des guoden morteres gelichenisse . hat die otmuodicheit .
 46,10 want si dat gecimbere der duogede zesamene hangen deit .
 46,11 So dat gecimbere mere were .
 46,12 it ceuile ane den mortere .
 46,13 Die otmuodicheit die duogeden binden sal
 46,14 of si sint gewisse der selen val .
 46,15 want die engestliche stolzheit liget imer in den lagen .
 46,16 dat si den guoden man de sich siner guoden bagit .
 46,17 Des bages strit is engestlich .
 46,18 he is so verborgen so heimelich .
 46,19 He cuomet selden in imannes mut .
 46,20 he in uonde da inne sunderlich gut .
 46,21 So zugit he sinen stric de is uistrickit
 46,22 de ime intfluet de is rehte selich .
 46,23 Der erste stranc is . dat der mensche wene .
 46,24 dat ime got sines guodes nit in lene .
 46,25 Bit deme stricke sint alle die gevangen .
 46,26 die gode nit in willent danken .
 46,27 des guodes dat he on hat gegeben .
 46,28 also si uan on seluen leuen .
 46,29 Nochdan uan deme wereltlicheme guode .
 46,30 dunt si dat in is ze muode
 46,31 inde spreche-n "dit is min eigen inde min erue .
 46,32 ich sal t gebruchen biz ich sterue- .
 46,33 ich sal der mide dun inde lazen .
 46,34 na minen willen setzen in- sazen .
 46,35 ich in erkennen hie ane nimanne ingeine herschaf .
 46,36 dat mir min vater van rehteme erue gaf ."
 46,37 Dar zuo antwrden ich dir bit warheide .

- 46,38 dat din eine strenge rechenunge beide .
- 47,1 da du must rehte rechenunge geuen .
 47,2 alles des dat du genomen heues .
 47,3 ein cleine ort in wirt dir nit gelazen .
 47,4 du in muozes it wider geuen bit rehter mazen .
 47,5 So salt du bekennen wes dat gut were .
 47,6 des du up ertriche hizes here .
 47,7 Dat selue spreken ich van deme guode der selen inde liues .
 47,8 want it muoz allet under einer rechenungen bliuen .
 47,9 Der ander stric is . dat der mensche pruuert sine waledat .
 47,10 inde dar up leget sowat he guodes hat .
 47,11 Dise willent gode benemen sine genade .
 47,12 de uergeues giuet alle sine gaue .
 47,13 Der dritde stranc geit up geistliche lude allermeist .
 47,14 die wenent dat si aleine hauen den heiligen geist .
 47,15 inde uersment andere lude die sundich sint .
 47,16 dar zuo driuet si der stolzheide wint .
 47,17 Der uierde stranc is alse si wenent dat hauen
 47,18 des aneginne ni an on in wart erhauen .
 47,19 Dere ogen sint des stubbes des stolzen bages so vol .
 47,20 dat si an ireme wane worden sint also dol .
 47,21 Vvan dise ho stricke bedruget die otmuodicheit .
 47,22 die alle wege sicherliche bi der erden geit .
 47,23 Alhie Sprich va- de- gelen bluomen der lilien
 47,24 Die bluome die uns die mi-ne bitzeichenet si is wiz
 47,25 dat solen wir billich wesen . hauen wir is uliz .
 47,26 Vvant wat mach uor godes ogen so schone sin .
 47,27 inde so reine alse der minnen schin .
 47,28 DAr umbe mirket der wisseide wort bit sinnen .
 47,29 “ich bin” sprichet si “muoder der schoner minnen .”
 47,30 Jt sint andere minnen die in sint nit schone- .
 47,31 die sint verre van diseme loue . inde van deme lone .
 47,32 Etceliche lude minnent den schaz . inde die ere .
 47,33 etceliche des uleisches gelust . it sint allet irrere .
 47,34 WAnt ire minne cuomet van grozer dumbenheide .
 47,35 die schone minne cuomet van der wissheide .
 47,36 Got is die schone minne inde die reine .
 47,37 mi-ne dise minne sunderliche . inde aleine .
- 48,1 Dise minne sal dich geweren
 48,2 alles des din herce mach begeren .
 48,3 Sich an diser werelde bluome .
 48,4 manich herschaf . bit deme richeduome .
 48,5 Sich dat mere inde die wazer alse samen .
 48,6 da in is nit ane behalue den name- .
 48,7 Jt dunket si getzuat sin die arme blinden .
 48,8 it sal si wale erwerin alse si die warheit suolen beunden .

48,9 Ganc hore inde mirke des himeles lutercheit .
 48,10 he is schone dat is du warheit .
 48,11 Vvane alda in sal dine minne nit bliuen .
 48,12 ganc noch uurebaz zuo deme ewigeme liue .
 48,13 Dunkent dich dise geschefnisse schone inde gut .
 48,14 kere bit vlize an iren scheppere dinen mut .
 48,15 want da sal du uinden die ouerster hereit .
 48,16 die suoziste walegelust . die uncegencliche richeit .
 48,17 an den salt du dine minne wenden .
 48,18 an deme salt du dine minne enden .
 48,19 Durch der schoner minnen ende .
 48,20 salt du minnen sunder ende .
 48,21 want ich in mach dine gerunge nit horre brengen .
 48,22 dar du dine minne salt lengen .
 48,23 Jt is gut dat du an deme ende sunder ende bliues .
 48,24 an deme cuoninge des ewige- liues .
 48,25 Alhie Sprich van der luden minnen
 48,26 Wir hauen geschriuē ein lutchel uan der godes minnen .
 48,27 dat du zuo unser minne geuen woldis unsen cranken sinnen .
 48,28 wir han gesprochen alse wir mohten nit alse wir solden .
 48,29 alse wir cunden . nit alse wir wolden
 48,30 Nu muozen wir volgen der matterien .
 48,31 die wir bestanden hauen van der lilien .
 48,32 inde uan den gelen bluomen spreken .
 48,33 die du seis in den wizsen bluomen stechen .
 48,34 Die gelen bluomen muogen uns die minne bezeichnen .
 48,35 die wir unseme euen cristenen suolen reichen .
 48,36 Die godes minne in mach sunder dise nit bestain .
 48,37 de got minnet he muoz och die minne zuo sineme nesten han .

49,1 Vnse nesten sint alle die lude .
 49,2 ich in verwerpen noch heiden noch iuden
 49,3 Uvant wir suole- in allen des gunnen .
 49,4 dat si erluotet werden van der ewiger sunne- .
 49,5 Doch suolen wir groz bescheidinisse hauen .
 49,6 zuo weme wir allermeist minnen suolen dragen .
 49,7 Des muoze uns de guode meister bescheiden .
 49,8 die uns zuo disen worden . wolde leiden
 49,9 “Den man ane maze minnen sal dat is got .
 49,10 want dat wir on minnen dat gebuodet dat erste gebot .
 49,11 Dar na salt du dich seluen minnen .”
 49,12 o wi wie luotzel der is die sich des uersinnen .
 49,13 Vuant sich seluen in minnet niman .
 49,14 wan de siner selen ze uorderst guodes gan
 49,15 inde dar na sinen lichamen also minnet
 49,16 dat it die sele nit in uerwinnet .
 49,17 Nu mirke of du imanne muoges uinden:
 49,18 de wider sine sele arbeide unde arbeide sinen kinden .

- 49,19 wie he on gewonne groz wereltliche erue .
 49,20 so he sine sele van deme himele inteue .
 49,21 Dit sint die gine die woherent si ne wizen weme .
 49,22 alse si steruent si in wizen we dat gut neme .
 49,23 Der pphete sprichet "si suolent uremeden luden lazen ."
 49,24 dit wort hat iammers uile uzer der mazen .
 49,25 want wir muozen dat uernemen
 49,26 wie unse kindere die unse erue muozen nemen .
 49,27 wie si uns imer vremede muogen werden .
 49,28 die uns so lif so lange sint gewesen .
 49,29 Hon aue willen ich dich curtliche bescheiden .
 49,30 want ich willen dich an dich selue- leiden .
 49,31 inde lazen t zuo dines selues urdeile .
 49,32 os ich unwar sage an einicheme deile .
 49,33 Sich wat du dinen altuorderen geues van dineme erue .
 49,34 des seluen salt du wardende sin van dineme eruen .
 49,35 inde lihte michel min .
 49,36 dar na dat he keren sal sinen son .
 49,37 Alse du dinen uliz keres an dine kint .
 49,38 also suolen dine kindere an ire kint .
- 50,1 inde alse vremede alse du diner uorderen selen bis .
 50,2 also suolen dir dine eruen des sis gewis .
 50,3 Jnde dat wizen alle die ire kint bit suntlicheme guode eruent .
 50,4 dat si beide ire sele in der eruen sele steruen .
 50,5 Vvant sowe sich weiz an bosome guode wesen .
 50,6 he muoz it widere geuen . wilt he genesen .
 50,7 Dit sal weren an den dusichsisten eruen .
 50,8 de ecker wizen mach dat he besitzet unreht erue .
 50,9 Her u-be die sich minre minnent dan ire kint .
 50,10 si sint uile kindisch . inde uile blint .
 50,11 Vuane willen wir die lutere warheit sprechen .
 50,12 si in minne-t die nit die si zuo der hellen brengen .
 50,13 Vvant sowe deme anderen nimet siner selen ere .
 50,14 he is sin doituient . he hazet on sere
 50,15 Vvant die sele is bezere dan einiche wereltliche haue .
 50,16 die uile curtliche muoz ein ende hauen .
 50,17 Vvant antweher die haue begiuet dich so du nochdan beheldes dat leuen .
 50,18 of du muozes die haue an dineme snellen dode begeuen .
 50,19 Dan wirt it dir machende iamer inde ruen .
 50,20 dat iamerliche bir dat du leuende has gebruen .
 50,21 du in maht it nimer uerduowen .
 50,22 dumbe mensche dronc win de dei dich vrowen .
 50,23 Zuo dineme bire is bose gruz geme-get .
 50,24 die dine sele zuo grozen noden brenget .
 50,25 Din bir dat du brues is wereltlich gewerf .
 50,26 want it des heuils der minnen nit in hat dar umbe bliuet it derf .
 50,27 Dat quit it in gehoret zuo deme himelschen dissche nit .

- 50,28 man drinket da ecker dranc de vrowede git .
50,29 Die sich hie lazent in deme keltere des widermuodes drucken .
50,30 die hie uerduldich sint in wereltliche ungelucke .
50,31 die suolen da der vruhte gevrowet werden .
50,32 die si bit iren henden wonnent hie an diser erden .
50,33 Dar umbe raden ich e du beginnes steruen .
50,34 arbeide gernere uor dich seluen . wan uor dine eruen .
50,35 Des du dir selueme deis . des has du sicheheit .
50,36 an dinen eruen bliuet groze ungewisheit .
50,37 want ir leue- dicke missegeit .
- 51,1 Js nu lihte ima- de rehte minne zuo sinen eruen halde .
51,2 dat he durch si wider sine sele nit in behalde .
51,3 uile cuome salt du imanne vonden .
51,4 de sin uleisch wille na der minnen rehte bonden .
51,5 inde deit duo der selen inde . des geistes lerunge uolgen .
51,6 inde den geist na deme vleische nit in kere .
51,7 Hie uerkerent si die minne alle die ireme vleissche so sere schonent .
51,8 dat si ime siner stolzheide nit in lonent .
51,9 wane si minnent it alze sere .
51,10 inde uolgent si ime sowa it sich hine kere .
51,11 Dise minne is gekeret unrehte .
51,12 want die sele sal man minnen me ze rehte .
51,13 dar na sal man den lichane an der minnen sazen .
51,14 dat man ime an der narungen geue guode maze .
51,15 also dat it sich wider den geist nit in erheue .
51,16 inde dat it zuo godes dineste gerehte leue .
51,17 Swoze got du da alle dinc geschaffen has bit mazen
51,18 du muozes mich an diser minnen also sazen .
51,19 dat ich alle ouerenzicheit muoze lazen .
51,20 dat ich zuo dir muoze cuomen bit der enger strazen .
51,21 Sowe weiz wie he sich seluen suole minnen .
51,22 de is genuch geleret an sines nesten minne- .
51,23 wa-t dat ander gebot leret dich .
51,24 dat ein iwelich sinen nesten minne alse sich .
51,25 dat quit du salt zuo ime die selue gunst dragen .
51,26 die du zuo dir seluer salt ze rehte hauen .
51,27 dat is die gunst nemeliche .
51,28 dat du ime des gunnes vlizliche .
51,29 sowat on uurderen mach zuo deme himelriche .
51,30 Vvan it sin noch andere minnen die man zuo den nesten dreget .
51,31 die manich du-b mensche up dit gebot leget .
51,32 so he sprichet "ich duon godes gebot .
51,33 ich minnen minen nesten dat gebudet got ."
51,34 Hie bidden ich dich dat du dinen sin willes bit ulize zuo keren .
51,35 want wir willen got bidden dat he uns wille leren .
51,36 diser minnen etzelich nuotze underscheit .
51,37 die manigen uerleidet . inde hat verleit

- 52,1 Die minne die man zuo den lude- pliget keren .
 52,2 dat si uierueldich So muogen wir bewerren .
 52,3 Sie eriste si is so suuer gut inde geistlich .
 52,4 die leste is al suuer bouse inde vleislich .
 52,5 intusschen disen zuein sint andere zua .
 52,6 die salt du bit vlize mirken her na .
 52,7 Der zueier minnen eine cuomet van naturen .
 52,8 die de lude deit an der minnen duren
 52,9 Die andere machet einer hande heimelicheit .
 52,10 der nu uile in der werelde umbe geit .
 52,11 Nv keren wir die wort zuo der erist' minnen .
 52,12 want die sal uns allermeist ligen an den sinnen .
 52,13 Dise minne si is algare . geistlich .
 52,14 zuo diser minnen is gebunden ein iwelich .
 52,15 de an deme gebode nit in wilt ercalden .
 52,16 dat got wilt uns zuo unseme nesten behalden
 52,17 Nu sin wir wat geistliche minne si .
 52,18 want die ander minnen si velsche-t si
 52,19 Dat sagen ich curtliche alse ich it uernemen .
 52,20 geistliche minne dreges zuo deme .
 52,21 zuo des geistes du dreges sogedane gerunge .
 52,22 dat du woldes dat ime aleine an den sachen wale gelunge .
 52,23 van den sines geistes selicheit sprunge .
 52,24 Cuome mach man dise minne uolliche geruoin . want die heimeliche minne
 pliget
 52,25 he sich zuo diser minnen erheuet .
 52,26 inde wirt ire dicke also gelich .
 52,27 da he uile selich sal sin inde sinnich .
 52,28 de si wale sal unterscheiden .
 52,29 so groze gerunge liget an on beiden .
 52,30 Jnde die gerungen sint euer so gelich .
 52,31 dat ir onderscheit in is nit gelich .
 52,32 WAn die minne die sich recket an den geist
 52,33 si is umbe den geist sorchsam allermeist .
 52,34 si uortet die stricke die deme geiste werdent gelaht .
 52,35 bit den he dicke wirt zuo den sunden braht .

 53,1 Vvereltlichen schaden inde des liues suchede .
 53,2 vortet si lutzel . want si machent die duogede .
 53,3 Wan die heimeliche minne si hat umbe dise dinc groze uorte .
 53,4 dat de vrunt besueret suole werden bit werken of bit worden .
 53,5 inde dat he suchede inde rue suole dragen .
 53,6 Van dise donc inde diser geliche leget si ire clagen .
 53,7 Dar umbe machet si dat herce dicke suar .
 53,8 die it besuht hauent si wizen dat wale dat ich spreken war .
 53,9 Alsus gedanen angest hauent och die geistliche gemuode .
 53,10 vmbe die die si geistliche minnent umbe ire duogede .

- 53,11 WAn doch an disen gedenken is ein schone underscheit .
 53,12 want die heimeliche minne uortet des uleisches leit .
 53,13 inde die geistliche minne vortet dat der selen vrume .
 53,14 bit der ungedolt muoge werden deme vrunde benuomen .
 53,15 wan die offenu-ge is der geistlicher minnen baz bereit
 53,16 dan si si der minen die cuomet van der heimelicheit .
 53,17 Och keret sich die eine me an die sachen .
 53,18 die man bit den uzerlichen sinnen mach gereichen .
 53,19 Si gelustet understunden baz des uleisches schonheide .
 53,20 dan des geistes gesuntheide .
 53,21 Si suket me wereltliche ere . inde richeit .
 53,22 dan an einem armen der selen selicheit .
 53,23 Si wilt sich an die keren die hauen burge inde lant .
 53,24 die armen si sint ire umbecant .
 53,25 Doch in spreche- ich nit dat man die richen nit i- suole minnen .
 53,26 man sal . also dat die richeit nit in si dat aneginne .
 53,27 Jch willen nochdan me minnen einen armen des geistes ich grozer hauen .
 53,28 dan einen wereltarmen de gerne wolde uile hauen
 53,29 Man sal got in beiden halue minnen
 53,30 ein iwelich geue urdeil van sinnen .
 53,31 Guot is die minne die cuomet van nature- .
 53,32 wane in giuet ire die geistliche nit ire sture .
 53,33 si wirt uleislich inde wirt ein haz .
 53,34 dat willen ich duden ein luzzel baz .
 53,35 Dat du dine kindelin minnes dat is gut .
 53,36 want dar zu duinget die nature dinen mut .
 53,37 wane wilt du si ecker na deme vleische zin .
 53,38 inde in wilt du den geist nit ane sin .
- 54,1 du salt an on sin dinen unwillen .
 54,2 want du si nit in zuges na godes willen .
 54,3 inde du must ire sunden bit on dragen .
 54,4 inde in den pinen bit on hauen .
 54,5 Vvant dat suolen wizen alle die den got kindere hat uerluen .
 54,6 dat si die suolen zin bit also grozen truen .
 54,7 alse si gode willen antwrde uor ire selen geuen .
 54,8 her na berihten irre kindere leuen .
 54,9 Jnde vlizichen sich seluen . dat si also leuen .
 54,10 dat si iren kinderen ingein bose bilde in geuen .
 54,11 Noch in schone- on nit of si ir leuen uouele ane uent .
 54,12 inde of si uzer godis wege geint .
 54,13 want die minne si is werliche ein haz .
 54,14 die den menschen machet der sunden uaz .
 54,15 inde de hazet sinen sun sprichet de wise man .
 54,16 de ime der ruden nit inuollen gegeuen i- can .
 54,17 Bit deme suren inde bit deme suozen .
 54,18 sal man den bosen willen buozen .
 54,19 inde rehte geleiden der kindere uuze .

54,20 dat si sich uor den sunden behuoden muozen .
 54,21 Jn der naturen minnen sich och man inde wif .
 54,22 want also got sprichet si zuei sint al ein lif .
 54,23 Ei wie groze minne inde vrowede is da .
 54,24 da beide man inde wif volgent der geistlicher minnen na .
 54,25 inde leuent so einmutliche samen .
 54,26 dat si hauent einen geist . alse si hauent einen lichamen .
 54,27 Vvant dat willen ich sagen den urowen allen .
 54,28 dat si suolen iren uliz han wie si iren mannen wale beuallen .
 54,29 it in si grozliche inde offenbare wider got .
 54,30 da suolen si ime halden godes gebot .
 54,31 nochdan sal man den mannen uolgen under stunden .
 54,32 dat si nit in uallen in merre sunden .
 54,33 Hie horet zuo groze bescheidenheit .
 54,34 die uns ze sagene were ze lanc inde ze breit .
 54,35 VAn gare uleischlicher minnen in willen ich nit sagen .
 54,36 want man sal si schuen . inde ire uolgere clagen .
 54,37 want si ilent in die abysse .
 54,38 in die ewige uinsternisse .

55,1 Alhie ane Sprich va- de- werken der minnen
 55,2 Nv gein wir wider in unse materien .
 55,3 inde uollesprechen die gele bluomen der lilien .
 55,4 die uns ein zeigen sint der minnen .
 55,5 da wir na gode unse nesten mide minnen .
 55,6 Die ses gele bluomen die du inbinnen den wizen sis stain .
 55,7 bit den salt du ses werc der barmherzicheide verstain .
 55,8 bit den wir unsen nesten suolen ze staden cuomen .
 55,9 inde wirken beide iren inde unsen vrumen .
 55,10 Dise barmeherzicheit in hat niman .
 55,11 de sinen nesten noch nit minnen in can .
 55,12 want dat herce muoz allererist van der minnen intwarmen .
 55,13 dat si sich uouer sinen nesten sal irbarmen .
 55,14 Dar umbe die werc der minnen inde der barmherzicheide .
 55,15 si sint al ein bit ingeinme underscheide .
 55,16 wilich dise ses werc sin der barmherzicheide .
 55,17 wolde uns unse heilant selue bescheiden .
 55,18 DAt eriste is dat man dem hungerigeme sal die spise geuen .
 55,19 DAt ander is dat man den durstichen sal bit deme dranken lauen .
 55,20 DAt dritde is dat ma- die geste sal zu der herbergen leide- .
 55,21 DAt vierde is dat man sal den nacheden cleiden
 55,22 DAt vonfte is dat man zuo den sichen geit .
 55,23 DAt seste is dat man den geuangen bi steit .
 55,24 An disen werken is so grose werdicheit .
 55,25 dat soweme man si durch godes minne deit .
 55,26 got sprichet it si ime selueme gedain .
 55,27 alse he selue wolde an deme ewangelio san .
 55,28 Alse des menschen sun gesitzet zuo deme urdeile .

- 55,29 he sal alle die lude i- zua scharen deilen .
55,30 Die guoden sal he setzen zuo der cesuer hant .
55,31 die bosen suolen zuo der luncere werden gewat- .
55,32 So sal der cuoninc sprechen
55,33 zuo den . die steint zuo siner cesuen .
55,34 “Cuomet gebenedieden mines uader .
55,35 inde intfeit dat riche algader .
55,36 dat uch ua- aneginne was bereit .
55,37 vroliche suolet ir dat in werden geleit .
- 56,1 Want duo mich hungerde ir gauet mir ezzen .
56,2 duo mich durste ir gauet mir dronken
56,3 Duo ich gast was ich wart van uch intfangen:
56,4 duo ich nach was . ich wart bit uren cleideren behangen .
56,5 Dvo ich siech was inde geuangen .
56,6 ir quamet zuo mir . mich ze trostene gegangen .”
56,7 So vrowent die gerechten sich .
56,8 inde sprechent “here wanne sagen wir dich
56,9 dat wir dir disen dinst irbuden .”
56,10 so antwerdet der cuoninc den guden .
56,11 “Sowar ir it dadet minnen minnisten .
56,12 da waret ir an mineme diniste .”
56,13 So keret he sich zu den die zu der linker hant suolen stan .
56,14 inde heizet si in dat ewige wr gan .
56,15 want si sich nit in hadden zu deme riche bereit .
56,16 bit den werken der barmherzicheit .
56,17 da mide si iren nesten solden hauen getrost .
56,18 aue si sich van den pinen wolden hauen geloist .
56,19 Nv mirke diser werke werdicheit .
56,20 den aleinen der himel is bereit .
56,21 die aleine den lof suolen hauen .
56,22 inde aleine suolen crone dragen .
56,23 in des grozen urdeiles dage .
56,24 Vvar umbe is dit wan dat dise sachen .
56,25 uns uollecumen an der minnen machen .
56,26 inde der minnen zeichen dragen .
56,27 die wir zuo den nesten suolen hauen .
56,28 want alse uns leret de godes minnere .
56,29 Johannes de suoze lerere .
56,30 “sowe sinen bruoder sit dat he in noden steit .
56,31 inde ime nit in hilpet bit der barmherzicheit .
56,32 wie mach godes minne in ime sin .
56,33 die bit den werken sich nit in machet sicschin .”
56,34 An diseme worde muogen wir dat wale mirken .
56,35 dat sowe die barmherzicheit nit in hat an den werken .
56,36 die bezeichent sint an den ses gelen bluomen .
56,37 he in is noch nit zuo godes minnen cuomen .

- 57,1 want godes minne in mach niman hauen .
 57,2 he in muoze och minne zu allen luden dragen .
 57,3 Minnes du alle die lude . also unse here sente johanne .
 57,4 inde dreges du vnminne zuo eineme manne .
 57,5 du in has der minnen nirigen ingein deil .
 57,6 dat dir imer dan aue muoge cuomen heil .
 57,7 hie sprich ane van der minne- zuo den luden
 57,8 Dat willen ich dich wisen bit godes genaden .
 57,9 got muoze uns dat beste wisen inde raden .
 57,10 Jhesus xp-c hat ein lichame dat he uan siner muoder liue nam:
 57,11 duo he durch unse minne in dise werelt quam .
 57,12 He hat och einen geistlichen lichamen .
 57,13 dat is he inde di cristenheit alsamen .
 57,14 Dat houet van diseme lichame is de guode Jesus aleine .
 57,15 der ander lichame is die cristenheit algemeine .
 57,16 Ein iwelich cristenmensch is ein lith an diseme lichamen .
 57,17 also uns leret sente Paulus bit namen .
 57,18 Nv sage . of ima- wolde din houet eren .
 57,19 inde wolde dinen uuz of dine hant besueren .
 57,20 woldes du dich it an sine minne keren .
 57,21 of dunket dich dat he din vient were .
 57,22 Sette he dir up din houet eine crone gulden: inde uan edelen gesteine .
 57,23 inde intfengede ein uur an dineme uuze . of dinem beine .
 57,24 ich wene- du soldes ime lutzeln danken siner cronen .
 57,25 so he dineme beine nit in wolde schonen .
 57,26 Reite alsus is it an Jesus geistlicheme lichamen .
 57,27 sowe on wilt minnen . he muoz on minnen alsamen .
 57,28 want sowe hazet einich siner lidere .
 57,29 he mach nit sin des houedes minnere .
 57,30 Du cusses mich alze uergeues vor minnen munt .
 57,31 wilt du mich an eineme anderen lide machen wnt .
 57,32 Vuilt du dat ich danke dir diner minne- .
 57,33 du must minen vinger also min houet minnen .
 57,34 Dit han ich gesprochen umbe sogedane sachen .
 57,35 dat ich die minne muge gemeine machen .
 57,36 want die minne hat so groze breide .
 57,37 dat si nimanne van ire in wilt gescheiden .
- 58,1 Vvan doch also da uore eines deiles steit .
 58,2 dise minne wilt hauen . groz underscheit .
 58,3 dat wir wizen zuo weme wir me minnen suolen dragen .
 58,4 also dat unse minne reite reit haue .
 58,5 Vuant sowiliche dinc nit in is redelich .
 58,6 sowie guot it si . it is unlouelich .
 58,7 Dar umbe willen ich bit curten worden .
 58,8 dir sagen der minnen orden .
 58,10 Die suolen uns an der minnen allernest wesen .
 58,11 bit dere lerungen wir suolen an der selen genesen .

58,12 Dat sint die guode predichere .
58,13 inde andere gereite lerere .
58,14 die uns bit der guoder lerunge wolden sterken .
58,15 an deme gelouen inde an guoden werken .
58,16 Dar na suolen wir die minnen alzehant .
58,17 die uns van der naturen sint bewant .
58,18 Die nature si sal uns selue beschiden schire .
58,19 wie wir die minne suolen ordineren .
58,20 Jch wenen dat an diser minnen die kindere nemen ouerhant .
58,21 jdoch me eren sal an uader inde an muoder werden gewant .
58,22 Vvant dat ma- die ze uorderst ere .
58,23 gebuodet got unse scheppere . alhie ane Sprich va- de- ordenen der minnen
58,24 Der na geit die minne der guoder heimelicheide .
58,25 die wir allererist suolen an unse gesinde breiden .
58,26 Jn is die minne bit geistlicher minne- nit intfenget .
58,27 wie lihte si beide heren . inde gesinde zu pinen brenget .
58,28 Vvant also meisteren die here- ires gesindes leuen .
58,29 alse si willen gode uor si rede geuen .
58,30 Dar na suolen wir unse nagebure binden bit der minnen .
58,31 dar na suolen wir unse lantlude minnen .
58,32 Dar na suolen wir minnen alle die an unseme gelouen sint .
58,33 ze iungest suolen wir an allen luden machen unse minne schin .
58,34 Vvant of wir nit me in hauen .
58,35 guoden willen suolen wir zuo allen luden dragen .
58,36 also uerre dat wir och unse uiende nit in uerdriuen .
58,37 willen wir bit deme guodeme Jesu bliuen .

59,1 de och uor sine crucigere bat .
59,2 durch ire helpe . inde unse lerunge dede he dat .
59,3 Soweme got der genaden gan .
59,4 de is reite ein uollecuome- ma- .
59,5 want ane zuiuel he is vrunt och andere luden .
59,6 de sinen vient minnet also got gebudet .
59,7 i-de dar umbe sal he dragen die ewige crone .
59,8 die den vollecuomenen minneren wirt ze lone .
59,9 Die houet der ses bluomen sint golde gelich .
59,10 da mide vernon ire werdicheit . die is ewelich .
59,11 Die siluerene stile dragen der guoder worde zeichen .
59,12 die du den armen salt bit den almusnen reichen .
59,13 Dv salt och bit guoden worden trosten ir armuode .
59,14 dat si it uerdragen bit senfteme gemuode .
59,15 so is dine almusene zuieldich worden .
59,16 an den werken . inde och an den worden .
59,17 Jnde so deis du baz bit den worden wan bit den werken .
59,18 alse die wort die sele sterken .
59,19 hie sprich ane va- der nuer minne-
59,20 Noch ich in mach gesprechen noch it in mach niman gehore- .
59,21 allet dat zuo diser minnen gehoret

- 59,22 wan wir sprechen dat wir muogen .
59,23 dat ingeiner hande minne nit in duge .
59,24 die geistliche minne in si da mide .
59,25 want si minnet der selen vride .
59,26 Dit is die minne van dere sente paulus sprichet .
59,27 “de sinen neste- minnet nit ime in gebrichet .
59,28 wat- he hat den ewen vollebraht .
59,29 want aller der ewe he is up die gebot gelaht .”
59,30 Johannes de sunderliche minnere .
59,31 he giuet uns och dise lere .
59,32 die uile sere mach die irueren .
59,33 die sich van diser minnen durren kere- .
59,34 He sprichet “sowe nit in minnet he is doit .
59,35 want he uersmet dat de leuende got geboit .”
59,36 In duo de guode Jesus saz zuo der merungen .
59,37 van der minnen was alle sine lerunge .
- 60,1 inde sprach “da mide sal man uch vnderkennen .
60,2 inde we werliche sal man uch mine iungere nennen .
60,3 of ir sunder einichen wandel .
60,4 die geware minne hat under einander .
60,5 Vvant ich gebieden uch dat ir uch intusschen minnet .
60,6 also ir wizet dat ich uch hauen geminnet”
60,7 MAn i- mach die minne nit inuollen gelouen .
60,8 wan dat is dat ouerste an der mi-ne loue .
60,9 dat got die geware mi-ne is .
60,10 inde minnes du dat du in gode bis .
60,11 inde got he is in dir .
60,12 herre . dise minne muoze imer sin in mir .
60,13 Gif mir dat ich dich inde minen nesten da mide .
60,14 minnen muoze bit also sulcheme vriden .
60,15 dat ich mine nesten in dir muoze minnen .
60,16 dat wir samen in dir bliuen bit der minne- .
60,17 Noch hauen ich einer hande minne bewnden .
60,18 die mir noch nit wale in is intbunden .
60,19 Die unbesuotten in suolen is gelouen nit .
60,20 wan iedoch is it dicke geschit .
60,21 dat ein mensche hadde manich iar sunderliche .
60,22 ein anderen geminnet inde heimeliche .
60,23 inde dat he dar na lihte einen vremeden sach .
60,24 wider den he ni wort in gesprach .
60,25 inde dat sine sele zuo deme vremeden gelich me wart gebunden .
60,26 in einer vile curter stunden .
60,27 wan si da vore were zuo deme alden vrunde .
60,28 deme he so lange wale guodes gunde .
60,29 inde des he hadde lange cunde .
60,30 Vvat machet so snelliche dise minne .
60,31 wat wandelet so heimeliche des menschen sinne .

- 60,32 Hon aue wolde ich gerne horen sprechen einen wiseren man .
60,33 wan doch willen ich sagen dat ich van godes genaden can .
60,34 Jnde willen doch alle zit gehoren eineme wisen
60,35 de mich it bezeres mach gewisen .
60,36 Jch wenen dat die nature vnder stunden mach dise minne .
60,37 die man so geliche sunder heimelicheit mach gewinnen .
- 61,1 Want alse zuoeine menschen die uan einer naturen sint .
61,2 zuosamene cuoment inde sich undersint .
61,3 die nature si zonet zehant stilliche ire maht .
61,4 inde bindet die herce die des nit in hadden gedaht .
61,5 An diser minnen warne- ich alle mine vrunt .
61,6 want si in hat nit heiligen wech noch ende zuo allen stut- .
61,7 inde dar umbe in sal man ire nit alse sere verhängen .
61,8 wan man sal si bit deme breidele der bescheidenheide duengen .
61,9 dat si die gerunge nit in muoge uzer deme reiten wege brengen .
61,10 dat vile lihte geschit wilt man ire den breidel lengen .
61,11 hie sprich ane va- der driueldicheide
61,12 NA langen umbegengen muozen wir doch dat ende suchen .
61,13 dat ende des wir aleines suolen ruchen .
61,14 dat ende des nimer ende in wirt .
61,15 dat ende des niman wiser inbirt .
61,16 dat ouer alle dinc is cuoninc inde wirt .
61,17 Dat ende is die heilige driueldicheit .
61,18 die alle dinc eruullet inde umbeveit .
61,19 der bezeichnenisse wir vonden an der driebegheiter bluomen .
61,20 die uns nu is ze sprechene zuo cuomen .
61,21 Dise bluome hat an der lilien die ouerste stat .
61,22 dat uuget wale . inde wale billich is dat .
61,23 want si dreget zeichen der ouerster driueldicheide .
61,24 der niman in genecket bit der werdicheide .
61,25 Der driueldicheide zeichen muogen wir an der bluomen vonden .
61,26 aue die driueldicheit . wilt unses hercen ogen intbinden .
61,27 want die bluome hat ein houet dat is drieckih .
61,28 da mide is bezeichet- ein got de is driueldich .
61,29 Dise bluome sal dat houet an der geistlicher lilien wesen .
61,30 want ane dit houet in mach niman genesen .
61,31 Dar umbe sint si alle doit an der selen .
61,32 die sich zuo diseme houede nit in willen keren .
61,33 inde si in gehorent nit zuo des cuoninges houede .
61,34 die nit in dunt alle donc zuo sineme loue .
61,35 dat sint alle die suokent ires selues ere
61,36 inde sich an die werelde cirheit kerent .
61,37 Dise in hauent des driueldigen houedes nit
61,38 want si in sint nit lilien . wan si sint ein grune rit .
- 62,1 dat uzwendich schinet als ith ezwat si .
62,2 want i-binnen wirt sine crancheit schin .

- 62,3 Wa- dare in cunnen die dumben ire oge- nit gekeren .
62,4 die imer starent na der wereltlicher eren .
62,5 Suoze got driueldich an der einueldicheide .
62,6 einueldich an der driueldicheide . ge
62,7 geruche unsen gedanc . wort . inde werc also geleiden .
62,8 dat wir diner eren aleine beiden .
62,9 biz wir cuomen zuo der weiden .
62,10 da du selue bis unse hirde inde unse geleide .
62,11 da wir dich seluen inde in dir seluen suolen weiden .
62,12 also dat wir nimer van dir in gescheiden .
62,13 Vvat hilpet it dat man guode wort sprichet inde guode werc deit .
62,14 da man it anders suchet wan die gotheit .
62,15 die den aleinen sal zuo lone werden .
62,16 die aleine godes ere suchent hie an der erden
62,17 Dar umbe gif suoze got dat wir alle dinc durch dine ere duon muoze .
62,18 dat du her na muozes unse armuode gebuozen .
62,19 inde na diseme dotliche liue willes vroliche gruozen .
62,20 die nu ligent inde weine-t zuo dinen uuzen .
62,21 Nv is it zit dat ich ime lof inde genaden geue .
62,22 van des genade- ich bin inde leuen .
62,23 de mich alse ich werliche mach geuolen . an diser uncundiger arbeide nit
in hat begeuen .
62,24 Jch genaden dir Jesu suoze heilant .
62,25 inde benedien dich alle cit . inde nu alzehant .
62,26 dat du mir so gutliche has gereichet dine hant .
62,27 biz ich cuomen bin uouer dit mere an dat lant .
62,28 aller der lof dis werkes sal werliche an dich werden gewant .
62,29 of iman it loueliches hie ane vant .
62,30 is hie it anders . da is mine crancheit mide becant .
62,31 die ich dragen an diser uleislicher want .
62,32 also lange so mich duinget dis dotliche bant
62,33 bizze ich cuomen an dat heimeliche vaderlant .
- 63,1 da dat ewige leuen sal an mir nemen ouerhant .
63,2 da mich de guode Jesus umbeve bit siner zesuer hant .
63,3 Hauen ich it gesprochen dat wider die czuht . oue wider den gelouen geit .
63,4 dat ze bezerene bin ich alle wege bereit .
63,5 An deme ich dit werc began dat weres du .
63,6 an deme ich it och enden . guode suoze liue . Jhesus .